

WANTOK

NIUSPEPA BILONG YUMI OL PAPUA NIUGINI STRET! 30 YIA NAU

32 pes


Namba 1,370

Wik i stat long Fonde Septemba 28, 2000

70t

Ol ripot long Palamen

pes 2



Anivesari bilong
PORGERA
SAPLIMEN



pes 21 - 30


Prais bilong bensin na pe bilong ol pablik sevan go antap

pes 3

Bihainim pasin kastam bilong kamapim bel isi

• Papa William Liam na Andrew Bonny wantaim mama bilong ol bilong ples Saikisi insait long Yamil/Tamavi Lokol Level Gavman eria long Maprik, Is Sepik i sanap na soim ol yam na ol arapela samting bilong gaden ol i yusim long seremoni bilong sekan na kamapim bel isi pasin wantaim memba bilong ol Sir Peter Lus.

Poto: Edward Meata



NEC rausim Flai Riva Gavman

VERONICA HATUTASI i raitim

NESENEL Eksekjutiv Kaunsil long dispela wik i rausim pawa bilong Flai Riva Provinsel Gavman insait long Westen provins, Praim Minista Sir Mekere Morauta i tok.

Dispela i min olsem gavman i rausim pawa bilong provinsel gavman long karimaut ol wok etministresen, fainens na wok bilong mekim ol disisen long provinsel gavman.

Sir Mekere i tok NEC i rausim Provinsel Edministreta David Ipasi na putim Ruma Tau olsem eking etministreta husat wantaim manesmen grup bilong em bai lukautim ol wok long provins inap long taim ol i stretim hevi Flai Riva gavman i stap long en.

NEC i wokim dispela samting long wanem provinsal gavman ya i no

yusim gut na pulim pablik mani long bringim sevis na developmen i go long ol pipel na provins.

Sir Mekere i tok ol i rausim pawa inap long 12-pela mun.

Ol provinsel etvaisa bai wok wantaim Mista Tau na ol opisa bilong Dipatmen bilong Pesenel Manesmen, Treseri na Fainans na Provinsel na Lokol Level Gavman Afeas long ranim provins, Sir Mekere i tok.

Treseri na Fainans bai karim wok painimaut long wok mani bilong Flai Riva gavman na NEC i tok orait long Odiata jenerel bilong karimaut ful odit long ol provinsel akauns bilong 1997, 1998 na 1999.

NEC i givim tok orait tu long Plis Dipatmen bilong painim ol lain husat i bin stap insait long wok bilong paulim mani bilong Flai Riva gavman na kotim ol.

Provinsel Edministreta David Ipasi na ol arapela wokdain bai stap long saspensen tasol ol bai kisim ful pe yet.

Praim Minista i tok Flai Riva Provinsel Gavman i bin feil long kisim sevis i go long ol pipel na tu long yusim gut mani bilong pablik husat i save peim takis insait long kantri.

Ol bin teblim dispela keis bilong Flai Riva Provinsel Gavman long palamen long mun Februari na bikos ol bin wok long mekim ol wok painimaut long en, NEC i no bin wokim disisen long en inap nau.

Sir Mekere i tok NEC i wokim dispela disisen long helpim ol pipel husat i kisim taim tru bikos long wok nogut bilong sampela lain.

Em i tok pasin we Flai Riva gavman i feil long bihainim ol statok bilong gavman i soim olsem pasin bilong no wok hait, yusim gut mani na ranim gut gavman i bagarap na dispela i kamapim hevi long rot bilong skruim sevis i go long ol pipel na provins.

Lidasip traibunel i rausim Kas

RAYMOND PALANGAT i raitim

LIDASIP Traibunel i rausim pinis Madang Gavana Jim Kas olsem memba bilong palamen.

Taim em i givim disisen long aste apihun Traibunel i tok olsem dispela pasin Mista Kas i bin mekim long Madang ples balus long Februari 21, 1998 i givim bikipela sem long kantri na i no gutpela pasim em i bin mekim olsem wanpela lida.

Klostu stret traibunel i no givim disisen bilong taim loya bilong Mr Kas Greg Shepherd i putim wanpela aplikasin long Nesenel Kot long ol lukluk long wanpela disisen traibunel i bin mekim long Septemba 15. Dispela aplikasin i bin askim tu olsem bai traibunel i mas stapim pastaim penalti o

mekim save inap Nesenel Kot i harim aplikasin bilong ol long Oktoba 5.

Tasol siaman bilong traibunel Jastis Mark Sevua i tok olsem ol i no bin kisim wanpela oda i kam long Nesenel Kot we i tokim ol long stap pastaim.

Bihain em i ridim mekim save bilong Mista Kas husat traibunel i bin painim em i rong long las wik.

Kot i bin harim olsem long Februari 21, 1998, Mista Kas i bin sapos long kisim wanpela Air Link balus i go long Hagen long 7:30 moning tasol em i bin leit.

Taim Mista Kas i lukim olsem balus i laik tek op em wantaim tripela plisman i ronim ka siksti stret i go long ples balus na i stop klostu long balus na i bin traim long go insait long balus. Tasol pailot bilong balus i rausim em na i tek op lusim

em. Traibunel i harim olsem Mista Kas i bin brukim lo bilong Sivil Aviesen bikos em i no bin kisim tok orait long go insait long ples balus. Dispela tok orait ol i mas kisim long opis bilong Sivil Aviesen yet.

Kot i bin harim tu olsem taim balus i tek op lusim Mista Kas em wantaim ol tripela plis man i ronim ka bilong ol i go long teminol we em i no bin mekim gutpela pasin na i bagarapim ol wokman bilong Air Link. Bihain long dispela Mista Kas i go long opis bilong Sivil Aviesen we em i bin tokim ol long painim wanpela balus long kisim em i go long Hagen.

Long dispela taim EMTV i bin kisim em long TV na i bin luk olsem Mista Kas i spak.

Taim i givim mekim save long Mista Kas, Jastis Sevua i bin tokim kot olsem ol i bin lukluk long askim

bilong Kas' husat i bin tok olsem i em tru olsem em i bin mekim rong na tu ol i bin lukim olsem em i sori tru long dispela pasin em i bin mekim.

Jastis Sevua i tok olsem Mista Kas i bin man tru taim em yet i bin tokaut long rong em i bin mekim na i amamas long ol em.

Tasol Jastis Sevua i tok olsem em i wok bilong Mista Kas long apim gutpela pasin olsem wanpela lida na pasin em i wokim i no bin soim gutpela piksa.

Na long dispela as ol i mas rausim em olsem wanpela memba bilong palamen.

Taim traibunel i givim pinis toktok bilong em Mista Kas i tek op wantain loya bilong em. Na Loya bilong em i tok olsem ol bai salensim disisen bilong lidasip traibunel long kot.

Nestlé MILO IKEN WOKIM GUTPELA SAMTING LONG YU

Ol Is Nu Briten palamen memba sapatim strong Dion.

IS NU BRITEN

TUPELA nesanel palamen memba bilong Is Nu Briten i tokaut olsem ol i no laik kamap ekting gavana bilong Is Nu Briten provins we Francis Koimanrea i bin lusim long sanap resis long Pomio Open sia.

Mista Sinai Brown na Sir Rabbie Namaliu bai i no inap kamap ekting gavana bikos nau yet tupela ya i laik lukim deputi gavana na tu presiden bilong Bitapaka LLG, Leo Dion i pinisim wok bilong em inap yia 2002.

Mista Brown husat i makim maus bilong ol lida i tok ol i sapatim na amamas stret wantaim wok bilong Mr Dion na dispela bai skruim gutpela wok go het insait long gavman bilong em.

Em i singaut tu long ol lain long Pomio Open na tu long Rijinol sia bai - eleksen long lukluk gut na bihainim gutpela pasin na makim ol lida long taim ol i wokim bai ileksen.

Em i tok i moabeta long ol lain husat i tingting long resis long dispela tupela bai ileksen bilong tingting na skelim gut ol samting, nogut ol i westim mani bilong ol.

Em bin tok tru em i rait bilong ol man long sanap long bai ileksen resis tasol ol i mas wokim wantaim gutpela tingting na gutpela pasin na gutpela risal bai kamap we bai helpim olgeta pipel long provins.

Long wankain taim tu, olpela Gavana Francis Koimanrea i askim strong Mista Dion long sanap resis long sia bilong Gavana.

Em i mekim dispela toktok bikos em i bilip olsem Mista Dion i wanpela gutpela na strongpela lida.



Ol mama wok bung wantaim

• Ol meri Is Niu Briten i holim wanpela bung. Foto: File Foto.

Livae i no amamas long Nu Ailan Fising Asosiesen

NU AILAN

WANPELA man bilong Emirrau Ailan insait long Nu Ailan provins i no amamas long kamap bilong nupela Nu Ailan Fishing Asosiasen.

Man ya em John Livae husat i bin wanpela politisen wantaim Kavieng Taun Komisen tasol nau em i olsem wanpela fisamen o man bilong painim pis.

Em i tok em no amamas long kamap bilong dispela asosiesen bikos asosiesen i lukluk long laik bilong sampela lain tasol na i no long bikpela lain.

Em i tok em i laikim olsem dispela asosiesen i mas gat ol memba husat i makim olgeta lain fismen na tu husat ol lain i wok fama wantaim pis na ol narapela abus bilong solwara.

Mista Livae i tok ol pipel i no bin save na tu ol i no kisim wanpela toksave long kamap bilong dispela asosiesen we bai i gat i makim ol liklik lain tasol husat i bin intres long dispela Fising Assosiesen bilong Nu Ailan.

Em i tok ol as ples pipel husat i papa long solwara o ol risos ona i mas gat bikpela sea long dispela kain asosiesen na i no narapela.

Mista Livae i tok olsem nau yet asosiesen i no tilim gut membasip fi namel long ol memba we em i bilip olsem bai i gat bruk namel long ol yet long bihain taim.

Nau yet sampela ol memba i no bilong Nu Ailan yet na tu ol i no gat wanpela save long fisin industri insait long Nu Ailan yet.

Mista Livae i singaut long Fisheris Divisen wantaim Dipatmen ov Nu Ailan long lukluk i go insait long ron bilong Nu Ailan Komesal Fisin Asosiesen we bai i ken givim sampela kain helpim i go long ol asples pipel na tu i ken lukluk long laik bilong ol pipel yet.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Koimanrea bihainim laik bilong leit brata

WALTER DARIUS i raitim

IS NU Briten Gavana Francis Koimanrea taim em i risan long resis long Pomio sia tupela wik i go pinis i bin tokim pablik husat i bin bung long ples Salel long Pomio em i bihainim askim bilong brata bilong em, leti Alois Koki husat i bin dai long Ogas 22.

Mista Koimanrea na leit brata bilong em i go pas long wanpela strongpela hap rilijes na politikel grup long Pomio ol i kolim long Pomio Kivung Asosiesen. Hetkota bilong asosiesen i stap long ples Salel.

Planti asosiesen memba na ol pablik sevan i bin bung long dispela ples long witnesim risain bilong Mista Koimanrea.

Em bin mekim klia long pablik olsem ol i no inap long lusim Pomio sia i go long

han bilong ol yangpela Pomio pipel na olsem em i sanap resis long en. Tu em bin tok leit brata bilong em yet Mista Alois Koki bipo i dai i bin makim em long kisim ples bilong em long kisim ples bilong em long Pomio sia na tu long go pas long Kivung Asosiesen.

Bihain long planti toktok wantaim ol arapela lida insait long asosiesen, ol Kivung lida i bin laikim em long skruim wok we leit brata i bin holim, Mista koimanrea i bin tok.

Em bin tok leit brata bilong em i bin putim bikpela mani long ol projek na i gutpela long em i tekova na pinisim ol dispela projek.

Em bin tok sapos nupela man i go insait, ol dispela bikpela projek bai i no inap long pinis.

"Mi bilip ol em mi rait man long dispela wok. Ol pipe bilong Pomio i laikim nupela na strongpela lida husat i gat gutpela eksperiens long provinsel na nesanel na intenesenel vel." Mista Koimanrea i bin tok.

Mista Koimanrea bai resis long Pomio Open sia olsem lida bilong Kivung Asosiesen na wanpela sinia memba bilong Pipels Demokretik Muvmen (PDM).

Ol ripot i tok 20 arapela pipel i resis long dispela sia na ol bai salensim Mista Koimanrea.

Ol bin givim ol rit pepa long las trinde Septemba 20 bilong opim ol nominesen. Ol nominesen long ol kendidet i bin pas aste na ileksen bai stat long Novemba 1 na pinis long de namba 25. Ol Pomio pipel bai i save long nupela memba bilong ol bihain long Novemba 25.



Gavana Nakmai i sapatim tingting bilong yut na wimen grup

WES NU BRITEN

GAVANA na siaman bilong Wes Nu Briten provins, Clement Nakmai i tokim asembli bilong em olsem em i sapatim ol yut na wimen groups insait long provins.

Em i mekim dispela toktok taim em i bin welkamim Mrs Napkai husat i kamap nupela memba bilong Wimens Afeas insait long provinsal asembli.

Gavana Nakmai i tok dispela plen bilong gavman bilong em long lukluk long wanem hevi ol yut na ol meri i gat insait long komyniti na tu em i tok olsem dispela aidia bilong yut na ol meri bai kamapim ol plen na wok bilong olgeta yut na wimens grup insait long provins.


Long dispela taim tu, Deputi Gavana Francis Auram i tokim gavman long tilim moni gut i go long ol provinsal memba long karimaut wok

bilong ol.


Mista Auram i tok planti taim ol memba i save sot long moni na ol i no save wokim wok bilong ol gut bilong wan wa yia na yia i save pinis nating. Em i tok dispela ol memba i save makim ol yut, ol meri, sias na tu ol bisnis insait long provins.

Nau yet, Nesenal memba bilong Kandrian-Gloucesther Peter Arul i tokim asembli olsem em i no amamas long lukim Gavman na Provinsal Edministresen i lukim developmen bilong yut na ol meri i bagarap. Em i tok olsem dispela pasin i kamap bikos nogat wanpela bilong tupela administresen i luksave long polisi bilong yut na long dispela ol yut na wimens grup i no save develop.

Mista Arul i tok olsem planti gutpela bilong bipo i no lukluk long streitir kamapim wanpela polisi gaidla vebai ol yut na ol wimens bihainim.



SEPIK NIUS



Vanimo papagraun i papa long wanpela hotel long Jayapura

WINIS MAP i raitim

WANPELA papagraun kampani bilong Vanimo insait long Sandaun provins bai go insait long hotel bisnis long Irian Jaya we i stap long sait bilong Indonesia.

Siaman bilong Becil Holdings Michael Sakelu i tok long 1996 papagraun kampani i bin sainim wanpela Memorandum ov Andastending o agrimen pepa wantaim Eddy Gosal husat i developa na papa bilong Relat Indah hotel grup long Indonesia bilong kamapim wanpela join venta o patna na bildim hotel.

Becil Holding kampani i bin putim K800,000 olsem sea bilong em na em i papa long 50 pesen long bisnis taim Mista Gosal i papa long nara-pela 50 pesen sea.

Mista Sakelu i tok ol wok

konstraksen i bin stat long 1997 tasol long dispela taim ikonomi bilong Esia i bin bungim hevi na ol wok long Indonesia i no bin go het kwik.

Tasol em i tok wok i long hotel i klostu pinis nau na ol i tongitng long opim long neks mun, Oktoba.

Ol man i stat pinis long slip long hotel, stat long mun Julai yet.

Ol papagraun bilong Blok 1 inap long 6 long Vanimo Timba projek i papa long Becil Holdings kampani. Long 1996 ol bin tingting long putim mani bilong ol i go long hotel bisnis, maski hevi i stap long sait bilong politiks long Irian Jaya.

Becil Holdings i save kisim mani long ol primium na levi takis we Vanimo Fores Prodak kampani i save peim i go long ol papagraun long ol timba we ol i save salim long sip i go ovasis. Ol papagraun i bin tok orait long yusim mani bilong ol

long kirapim bisnis long Jayapura, Wes Irian.

Ol papagraun i bin tingting long kirapim bisnis long Jayapura bihain long gavman bilong PNG na Indonesia i tok orait long kamapim gutpela wokpren wantaim. Bihainim dispela, ol bin wokim haiwe rot i joinim Vanimo na Irian Jaya. Mekim na planti pipel bilong sait boda long PNG i wok long i go na i kam namel long tupela kantri. Dispela i bin strongim ol papagraun long go insait long hotel bisnis long Jayapura.

Hotel Relat Indah i gat faivpela stori na em i gat 50 rum long en. Restron na ples bilong kaikai i stap daunbilo. Ol i wokim gut stret wankain olsem long ol intenesenel level hotel.

Ol bai wokim tu konpres rum we i ken kisim 200 pipel long en.

Pe bilong wanpela rum i

stap namel long K75 na K200.

Mista Sakelu i tok ol i tingting long kukim ol kaikai we ol PNG pipel i save laikim bihainim komplem bilong planti PNG visita husat i no painim kain kuk kaikai olsem bilong hia.

Em i putim apil i go long ol gavman opisa na ol bisnis lain na tu pablik bilong givim bikpela tingting long stap long hotel Relat Indah taim ol i raun i go olsem long Jayapura.

Mista Sakelu i tok ol no laik resis wantaim ol arapela hotel tasol ol i laik helpim long kamapim strong Jayapura.

Becil Holdings i no nupela long hotel bisnis, nogat. Em gat sea long Granville Motel na inap long sampela taim i go pinis, em bin gat 50 pesen sea long Vanimo Bis Hotel.

Em i gat sampela haus long Islander Viles wanpela opis bilding, tupela haus na faivpela hap graun we i stap nating yet lojg Vanimo taun.

Demokresi em i bikpela samting

PAPA bilong kantri na namba wan Prais Minista na nau Bogenvil Afeas Minista Sir Michael Somare i amamas long sampela gutpela samting na ol developmen i kamap long kantri insait long las 25 yias.

Sir Micheal bilong ples Murik Leks long Is Sepik i bin selebretim tu 25 yias bilong em long stasp insait long politiks taim PNG i amamasim 25 yias independens long tupela wik i go pinis.

Em i tok tru kantri i bungim ol hevi insait long 25 yias em i kisim independen long Australia, em bin gat ol gutpela wok kamap tu.

Em i tok demokresi em wanpela bikpela samting na insait long 25 yias, kantri i holim pas long en.

Sir Michael i bin tok tru yumi i no mekim ol samting long inapim laik bilong olgeta pipel na grup, planti wok developmen i kamap long kantri bilong sapatim independens bilong yumi.

Em bin tok kantri i kamapim gutpela wok go het long sotpela taim tasol planti hevi tu i stap we yumi wantaim i mas stretim long go hetim gut kantri.

Sir Michael i tok tru ol wok long lukautim ikonomi bilong kantri i no go gut tumas olsem yumi laikim, yumi nau i mas wok hat long kamapim gut dispela (ikonomi) na ol pipel bilong yumi i ken gat gutpela laipstail.

Em bin tok PNG i laki olsem ol pipel i gat graun we ol i ken wok long en na kisim mani na ol kaikai samting bilong lukautim ol yet na ol famili bilong ol. Sapos nogat, ol pipel bai i sot long ol samting na dispela bai bungim moa hevi yet.

Tamil/Tamavi pipel kamapim bel isi wantaim Sir Peter Lus

EDWARD MEATA i raitim

MOTUNGEI Komyuniti skul insait long Maprik ilktorel long Is Sepik provins bai sanapim wanpela dabel klasrum wantaim K7,000 helpim we palamen memba bilong ol Sir Peter Lus i givim.

Dispela i bihainim wanpela bel isi seremoni we i bin kamap long Motungei Komyuniti skul pilai graun las wiken.

Moa long 2.000 pipel i bin witnesim seremoni bilong kamapim bel isi pasin namel long ol pipel bilong Yamil/Tamavi Lokol Level Gavman eria na palamen memba bilong ol Sir Peter Lus long las wiken.

Ol Boi Skaut na Bras Ben bilong ples Saikisi wantaim ol Tambarin Gels i bin putim kamap ol gutpela mas na pilai musik wantaim Bras ben bilong ol na mekim ol man i amantas tru.

Yamil/Tamavi eria i wanpela long ol foapela distrik long Maprik ilktoret we nogat gut-

pela developmen i kamap long en. Tasol ol pipel bilong dispela distrik i bin laik soim lida bilong ol Sir Peter olsem ol i lain bilong hatwok na ol i ken lukautim ol yet long dispela taim we laip i hat tumas.

Bihain long nesenenel ileksen bilong 1997, sampela belhevi i bin kamap namel long ol pipel bilong dispela eria. Na taim ol i no kisim gut sevis, ol i wok long wari planti long dispela. Ol i laikim ol sevis i mas kamap long eria bilong ol gen.

Mekim na long las wik ol i tok i moabeta long ol i sekan na kamapim bel isi pasin wantaim memba bilong ol.

James Maulungei bilong ples Kombikum i bin go pas long ol samting bilong kamapim bel isi pasin.

Em i tok em bin sori tru long lukim olsem ol pipel i no kisim gut sevis na ol i bungim hatpela taim.

Em i tingting planti na toktok wantaim ol pipel na ol bin tok orait long holim dispela seremoni bilong kamapim bel isi pasin namel long ol na Sir

Peter.

Ol bin lukim Silva Jubili aniveseri olsem gutpela taim bilong holim dispela bel isi pasin seremoni long en.

Mista Maulungei i tok pasin kastam em i gutpela rot long stretim ol belkros na belhevi na olsem ol pipel i bin bihainim kastam pasin bilong ol Maprik pipel na givim wanpela pik, ol bikpela yam na kastam ring mani i go long Sir Peter.

Ol bin bungim bel kol seremoni wantaim aniveseri selebren na dispela i bin kisim wanpela wik olgeta bikos ol i statim long Mande na pinis long las wik Sarere.

Ol Tambarin Gels i bin kisim Sir Peter i go insait long eria we ol bin kamapim seremoni bilong sekan na bel isi pasin na soim em long ples bilong sindaun we ol i redim na bilasim gut tru na dispela i mak long luksave bilong ol bikman.

Sir Peter i tok em i lukim olsem ol pipel i tok sori na em tu i wokim wankain na tupela wantaim i belkol na kamap gut gen.



• Ol bol i karim Sir Pita Lus i go long mein opisal dais. Sir Pita i tok olsem dispela em i nambawan taim bilong em long go long Tamil/Tamani LLG eria. Em i bin givim K7,000 i go long ol pipel long dispela bung bilong em wantaim ol. Foto: EDWARD MEATA.

always hit the spot!

Arrow Beef


Arrow



SAUTEN



RIJON



Oro provins gat gutpela aniveseri selebresen

HELEN REI i raitim

ORO provins i bin gat gutpela independens aniveseri selebresen, ol ripot i tok. E k t i n g Edministrata Paul Namono i tok olgeta distrik long provins i bin holim ol selebresen long ol Lokol Level Gavman eria bilong ol na ol samting i bin go gut tasol.

Mista Namono i

tok Nesenel Ivents Kaunsil i bin givim toksave bilong ol wan wan distrik i holim ol selebresen insait long ol LLG bilong ol yet.

Em bin tok dispela i gutpela bikos sapos ol i holim ol selebresen long Provinsel hetkota long Popondeta, nogat planti pipel bai kamap long en bikos long ol kain hevi olsem trenspot na ol arapela samting moa.

Long Popondeta, tupela bikpela pilai

spots i bin kamap. Dispela em long nesenel ragbi tas pilai na kriket tonamen.

Long Septemba 16, ol bin statim ol selebresen wantaim seremoni bilong apim fleg long Popondeta indipenden oval. long moning. Bihain long en i bin gat ol tumbuna singsing na danis na ol arapela samting moa. Long apinun taim ol i daunim flek, ol singsing tumbuna na

danis i bin go het yet.

Ol grup i bin skruim ol singsing tumbuna na danis long Sande inap long apinun.

Mista Namono i tok ol bisnis haus tu i bin sapotim gut ol selebresen na dispela i bin gutpela tru na ol atoriti long provins i amamas long en.

Em i tok ol bai wokim ol ripot long ol dispela samting na givim i go long NEC bilong lukim na glasim.

FM Sentrel bai brotkastim ol palamen bung toktok

WINIS MAP i raitim

OL LAIN i save long tok ples Motu i ken harim ol palamen bung na ol memba i toktok na mekim ol bikpela disisen we i karamapim kantri na pipel long nupela FM redio stesen, FM Sentrel.

FM Redio Sentrel i kisim tok orait pinis lojg brotkastim laip ol

palamen sesen.

Klak bilong Palamen Ano Pala i bin kamap wantaim dispela tingting na manesmen bilong FM Sentrel i bin wanbel long en na nau ol i go het long bihainim.

Namba wan brotkas long dispela i bin kamap long las wik. Ol bin laikim brotkas i stat long las Mande tasol sam-pela hevi long

teknikol sait i kamap na ol i no bin statim brotkas long las Mande.

Wanpela sinia program opisa wantaim FM Sentrel i tok arenjmen bilong dispela yia i stret pinis na aninit long en, ol bai kamapim laip brotkas long Tokples Motu we ol lain i save tanim toktok bilong palamen yet bai wokim.

Opisa i tok ol i laik

stretim wankain samting bilong neks yia tu.

Opisa i tok, FM Sentrel i gat bikpela bilip olsem ol pipel bilong Sentrel provins na ol arapela lain i save long tokples Motu bai lainim planti samting long harim ol toktok bilong ol bikman, moa yet long program "Kwesten i nogat toksave" long en.

Ol Tolokuma papagraun laikim rivyu long agrimen

OL TOLOKUMA Gol main papagraun insait long Sentrel provins i singaut long Nesenel Gavman na Tolokuma Gol Main kampani long sekim na glasim kwiktam ol agrimen toktok we i stap insait long Memorandum ov Andastening (MOA) namel long dispela tripela grup ya.

MOA em dispela luksave we tripela grup i kamap wantaim long luksave long wanpela narapela long ol samting we i sut long main na long graun na ol wok developmen we ol asples na papagraun i go insait long en long helpim sindaun bilong ol, komyniti na kantri.

Yulai Lenona Asosiesen i makim maus bilong ol papagraun i wok long skruim ol toktok long rivyu dispela samting kwiktam. Tolokuma Gol Main i stap long Tapini Distrik bilong Sentrel provins.

Asosiesen i bilip olsem gavman na kampani i asua long i no rivyuim ol glasim

MOA bihain long tupela yia olsem ol i bin tok pastaim long en.

Ol i tok em i kisim foapela krismas long wokim rivyu long dispela MOA ol bin sainim long 1997.

Ol papagraun i no amamas olsem projek divelopa i feil long luksave long agrimen we ol i bin kamapim long Februeri 24, 1997.

Dispela MOA i tokaut long ol gutpela samting we ol papagraun bai kisim long helpim sindaun bilong ol na ol famili. Na long 1997 MOA kampani na stet i bin wanbel long redim ol samting i karamapim ol bisnis we main bai pulim na ol lenona bai go insait long en, wokim ol rot, fandim ol projek aninit long takis kredit skim, givim wok na trening i go long ol yangpela pipel long eria na sekim MOA bihain long olgeta tupela krismas.

Seketeri bilong Yulai Lenona Asosiesen Fabian Aia i tok Tolokuma Gol

Main i feil long kamapim ol dispela samting na sevim ol asples pipel long en.

"Long sait bilong Takis Kredit Skim nogat wanpela samting i kamap," Presiden bilong Guiari Lokol Level Gavman Mathew Poiya i tok.

Em i tok Sentrel Provinsel Gavman i no kisim wanpela mani insait long las foapela krismas.

Em i tok long las yia tasol, em bin kisim K1 milien.

Aninit long agrimen, divelopa em Tolokuma Gol maining kampani i sapos long peim wan pesen long winmani em i save kisim taim em i salim go long Spesel Sapot Gren tasol i nogat inap long las yia taim em bin peim K1 milien.

Mista Aia i tok ol papagraun i no amamas long pasin we nesenel gavman na Tolokuma Gol kampani i mekim long i no bihain ol samting we tripela grup i bin tok orait long en na sainim MOA long 1997.

Jubili em namba wan Katolik ejensi sekonderi skul long Nesenel Kapitel

KATOLIK Asdaiosis bilong Pot Mosbi i bin opim namba wan sekonderi skul bilong em long dispela mun.

Praim Minista Sir Mekere Morauta i bin opim Hohola Sekonderi skul insait long Nesenel Kapitel Distrik long Fonde Septemba 14 bipo tasol long aniveseri wiken. i kamap.

Pastaim ol i kolim skul long Hohola Sekonderi tasol bikos dispela yia em Jubili yia na tu kantri i amamasim silva jubili bilong em, ol i kolim skul nau long Jubili Sekonderi Skul.

Skul i bin stat long dispela yia tasol na i gat 105 painia Gret 11 sumatin long en.

Skul i stap long sem ples we Sen Tresa klinik na Dem Mary Kekedo intenesenel skul i stap long en long Hohola. Skul ya i susa skul bilong Gordons Intenesenel Edukesen Ejensi skul.

Skul i hap long plen bilong

Asdaiosis we bai i wok wantaim ol arapela Katolik hai skul insait long siti. Taim olgeta wok i pinis, skul bai i kisim ol man na meri, stat long Gret 9 inap long Gret 12. Ol sumatin bai i save slip long ples na go long skul. Mak bilong ol sumatin we skul inap long kisim em 660.

Dispela bai i givim sans tu long ol papamama na ol sumatin long De La Salle na Marianville Hai skul long Pot Mosbi sapos ol i laik salim ol pikinini bilong ol i go long bodong na miks manmeri skul.

Hohola Katolik Sekonderi skul we nau ol i kolim long Jubili Sekonderi em i namba wan skul insait long kantri we sios i papa long en na i kisim ol Gret 11 na 12 sumatin long en.

Sir Mekere taim em i opim skul i bin tok dispela em i

bikpela samting long plen bilong Asdaiosisilong aggre-tim ol hai skul bilong em i go long sekonderi level. Na tripela skul bilong Asdaiosis em long Marianvil, De la Salle na Hohola bai givim edukesen level i stat long Gret nain inap long Gret 12.

Sir Mekere i bin tok tu olsem dispela i soim gutpela wok bung i stap namel long gavman na sios long kamapim moa spes long ol pikinini long skul long gutpela ples we ol gutpela tis-abai lukautim na skulim ol.

Aninit long bilding program bilong NCDC skul i bin kisim helpim mani K145,000 bilong mekim ol faundesen wok long en.

Projek bilong sanapim ol skul bilding bai kostim K4.5 milien na NCDC bai i peim haf taim Asdaiosis bai i peim narapela hap long en.




BOROKO FOODWORLD AT GORDONS

Liklik prais Kakaruk insait long Pot Mosbi!			
Ilimo Kwikkai 900gr	K4.10	Zenag Kaikai 900gr	K4.10
Ilimo Choice Pieces 900gr	K4.35	Zenag Stewing Pieces 900gr	K3.60
Ilimo Chicken Size 16	K6.60	Zenag Chicken Size 10	K5.50
Ilimo Drumstick 500gr	K3.70	Zenag Eggs 60gr per doz	K2.90




EXTENDED TRADING HOURS
 Monday to Wednesday - 8.00am to 7.30pm
 Thursday / Friday - 8.00am to 8.00pm
 Saturday / Sunday - 8.00am to

Planti moa kaikai prais i go daun long en!
 Ph: 325 7566, 325 0863 Fax: 325 7096



HAILANS NUIS



Pok givim K3 milien long ol projek

TIMOTHY AIMS i raitim

MINISTA bilong Petroluem na Eneji Dokta Fabien Pok i givim pinis klostu K3milien ol projek insait long ilektoret bilong em arere tasol long Banz taun long wik i go pinis.

Long dispela ol mani, bikpela mani, K800,000 i go long wokim nupela Banz distrik opis, wanpela buldosa mak bilong em K630,000, wanpela ambulens, 500 kopi masin, K100,000 bilong wokim ol vilis kot haus na K100,000 i go long Elkom.

Em givim K100,000 tu long lukautim dispela masin na K200,000 i go long Wellcos konstraksen bilong wokim wok long rot na narapela K50,000 long wanpela wara saplai projek long ol ples.

Dokta Pok i tokim ol lain husat i bung olsem dispela ol samting i kostim bikpela mani na ol pipel i mas traime long lukautim gut dispela ol projek.

Em i rabisim sampela toktok olsem em i wok long holim sampela mani

bilong ol Not Wagi Kansol, we em i tok dispela ol mani i no stap aninit long lukaut bilong em, na ol i mas askim Westen Hailans provinsel gavman.

Dokta Pok i tokim ol lain tu olsem EDF fan bilong em i bilong olgeta lain na i no bilong ol wanpinis bilong em, we planti lain i save tingting long em.

Em i tok rekot bilong em i stap kiin long opis bilong Rurel Developmen na olgeta lain i mas save olsem em i bilip long wok i stap long ples klia na i no hait long wanem dispela em i mani bilong ol pipel.

Wanpela kominti lida long dispela hap i tok tenkyu long Dok Pok long luksave long nid bilong ol pipel na kamapim dispela ol kain sevis.

Kambie Mungul, wanpela memba bipo bilong provinsel gavman i tok i gutpela olsem memba i kamapim dispela kain sevis long wanem em i soim olsem em i gat luksave long eria we i gat nid.

Em i tok longpela taim bilong independans planti senis i no kamap long dispela eria em i gutpela long lukim memba i go pas long dispela.

Tari plis bareks bagarap nogut tru na helt atoriti tok i mas pas

PEKU PILIMBO i raitim

OL bikman bilong Helt insait long Tari, Sauten Hailans Provins i tok olsem Tari plis bareks i no gutpela long ol plismanmeri i slip na wok long en.

Fabiam Lamia, wanpela Helt Inspekta husat i mekim tupela lukluk raun long dispela yia i bin raitim wanpela pas i go long Sauten Hailans Provinsel Plis Komanda (PPC) Giosi Labi olsem ol dispela haus bilong plis long bareks i bagarap tru na i no fit long ol man i slip long en.

Dispela leta i rit olsem "Long dispela as ol helt atoriti i tok olsem ol dispela haus long bareks i bagarap nogut tru na ol manmeri husat i slip insait long dispela ol haus long bareks i mas lusim haus na muv aut.

"Ol i ken kam bek taim ol

autoriti (plis dipatmen) i tingim wok bilong ol na stretim olgeta haus we nau i bagarap i stap long bareks," pas i rit.

Long mun Julai 11, dispela yia i bin gat wanpela lukluk raun tu long dispela bareks we i soim olsem dispela bareks i gat planti bagarap i stap long en. Ol lain husat i mekim dispela lukluk raun i bin tok olsem olgeta bareks i bagarap tru na dispela i brukim lo bilong Public Health na Sanitation Ekt long kantri.

Tari Plis Stesen Komanda Inspekta Nelson Gihigupa i tok Tari plis bareks i gat nid long kisim 15 haus bilong ol marit manmeri na 20 singel bareks.

Inspekta Gihigupa i tok em bai kisim mani inap K1.6 milien long sanapim dispela ol haus.

Inspekta Gihigupa i tok gutpela sapos gavman wantaim plis dipatmen i sanapim sampela

nupela haus o traime stretim sindaun bilong ol plis pastaim bikos Tari i gat planti lo na oda hevi i no long taim i go pinis.

Em i tok olsem ol haus i bin bagarap nogut tru na dispela i mekim tingting bilong ol man long wok i go slek.

Em i tok sapos ol man i slip gut na kam wok, dispela inap helpim ol long mekim gutpela wok.

Inspeta Gihigupa i tok i gutpela sapos dispela wok i kamap hariapna ol plis manmeri bilong Tari i ken wok gut.

Long sait bilong Mobail Skwat bareks long Kikita arere long Tari Stesen, haus i redi pinis na i op long las wik.

Tari plis i gat nupela plis stesen tu. Dispela plis stesen i bin kamap aninit long Kutubu Teks Kredit Skim.

Olpela plis stesen bai i stap olsem haus kalabus.

Peipul askim Imbongu pipel long wok wantaim em

JOE KANEKANE i raitim

MEMBA bilong Imbongu na ekting lida bilong oposisen Peter Peipul i askim ol pipel long ilektoret bilong em long wanbel wantaim em taim em i tilim mani bilong em long RDF prosek bilong em.

Mista Peipul i tok em i save mani i no inap na long olgeta prosek na distrik plening komiti bilong em luksave long ol eria we i gat bikpela nid na ol i mas weit long neks yia.

Em i tok ol samting olsem, klasrum, liklik rot, bris, rurel pawa, etpos na sios em olgeta lain i laikim tasol i nogat planti mani long inapim olgeta projek.

"Mipela i nogat inap mani long tilim long olgeta projek tasol mi singaut long ol pipel long luksave long wanem samting mipela i wokim. Olgeta yia bai mipela i luksave long wan wan ol bikpela projek na helpim, " Mista Peipul i tok.

Em i tok nupela gaidlain bilong ol projek i senis olsem na ol projek we mak bilong ol inap long K10,000-K60,000 we komiti bilong em i makim

em i senis.

Mista Peipul i tok i gat sampela lain i wok long wokim sampela stori olsem memba i no tilim aut mani gut, tasol em i laik toksave long ol lain olsem dispela em ol lain i wok long pilai politik.

Em i tok dispela ol lain i nogat wanpela gutpela samting long givim long ilektoret na ol pipel i mas luksave olsem em i gutpela long plenim ol bikpela projek pastaim long wanem planti pipel bai kisim helpim long em.

Mista Peipul i tok aut tu long disisen bilong Distrik plening komiti bilong em long ol eria we ol i tilim mani bilong dispela yia.

Dispela ol projek em;

- Imbongu hai skul-K200,000;
- Porgerapulg helt centre-K100,000;
- Imbongu distrik het kwata-K300,000
- Ialibu sekonderi skul- K100,000
- Iombi Top ap skul-K100,000
- Wakwak-Teta rot grevel-K100,000
- Sumia-Pinz rot K100,000



Bikpela hanmak long Hailans...



Dispela em Agiru Centre. Nupela provinsel gavman bilding bilong Sauten Hailans provins long Mendi. Ol raskol i bin kukim olpela provinsel gavman bilding na Gavana Anderson Agiru i bin sanapim dispela 7-stori bilong na givim nem bilong em yet. Dispela bilding i wanpela longpela bilding insait long hailans. Olgeta autsait samting i pinis na na nau yet ol i wok long putim sia, tebol, kapet, komyuta na narapela ol samting we inap kisim moa long K2 milien. Gavana Anderson Agiru i bin tok olsem bilding bai op long mun Oktoba dispela yia. Foto: PEKU PILIMBO.

Cat D6M

TRACK-TYPE TRACTOR

ENGINEERED TO EXCEED THE MOST DEMANDING GOALS

With increased power and rugged components, the versatile D6M is designed for tough and varied working conditions. It keeps material moving with the reliability and durability you expect from Cat machines.



Check out the D6M Track-Type Tractor at your nearest branch today!

Hastings Deering



PORT MORESBY
Phone: 325 6422
Fax: 325 0774

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAU
Phone: 982 1244
Fax: 982 1129



MADANG NIUS



Awar na Nubia pipel kisim skul bilong helpim ol yet

FUZO PAUL i raitim

MOA long 130 pipel bilong Awar na Nubia ples insait long Yawar Lokol Gavman Ilektolet bilong Bogia distrik, i bin sindaun long wanpela wan wik woksop we helt dipatmen i bin go pas long em aninit long Women na Child' helt projek bilong Ausaid.

Dipatmen bilong helt insait long Bogia na Bogia edministresen i bin go pas long ronim dispela wan wik woksop we het tok bilong dispela woksop em " komyuniti eksen na wokbung wantaim."

Ol kaunsel, sios lida, yut lida, meri lida, meri grup, ol yut na planti manmeri bilong dispela tupela ples i bin kamap long dispela woksop.

Astingting bilong dispela komyuniti eksen na wokbung woksop em long helpim ol pipel long ples na ol lokol komyuniti long stretim gut sindaun bilong ol na tu kirapim tingting na strongim ol long pasin bilong bungim tingting na wokim ol wok kamap long senisim na stretim gut sindaun bilong ol yet insait long komyuniti bilong ol.

Insait long dipsela woksop, ol lain i kisim skul i bin lainim ol rot bilong lukluk long ol hevi na

helpim we i stap nau insait long ples bilong ol na wanem ol rot ol i ken bihainim long stretim sindaun bilong ol.

Bikpela skul ol i bin lainim em rot bilong wokim plen na mekim ol projek o ronim ol liklik woksop insait long ples na komyuniti bilong ol.

Moa yet, dispela woksop i skulim ol long sanap long lek bilong ol yet na yusim tingting bilong ol long pasin bilong bungim tingting wantaim na wokbung long mekim plen na mekim ol samting yusim ol risoses bilong ol yet na wantaim liklik helpim bilong gavman na ol ausait lain.

Woksop helpim Awar pipel kisim wara projek

LONG pinis bilong wanpela wan wik woksop long Yawar Lokol Level Gavman kaunsel, ol pipel bilong Awar ples i bin painim aut na luksave olsem wara em i bikpela hevi tru insait long ples bilong ol.

Ol Awar pipel i luksave olsem namba wan samting ol i mas kamapim em wanpela gutpela wara saplai.

Dispela woksop i helpim ol long mekim plen na kamapim wanpela wara saplai projek insait long ples bilong ol.

Ol mama na ol yangpela meri tu insait long Awar ples i painim aut tu insait long dispela woksop olsem ol i mas kisim skul bilong samapim klos, kukim kaikai,

bukkiping na ol nupela rot na save bilong wokim gaden.

Long pinis bilong dispela woksop, ol mama i askim eking distrik edministreta husat i bin stap tu long dispela wan wik woksop wantaim ol piple long painim ol rot na kisim ol save manmeri bilong ol eria we ol pipel i sot long save long em, long go long ples bilong ol na givim ol dispela ol kain skul.

Woksop ya i bin pinis wantaim liklik kaikai na ol pipel i bin tok bikpela amamas ttru i go long helt dipatmen long Bogia na Bogia edministresen long bringim dispela woksop i go insait long ples bilong ol.

Ol kakau fama statim kampani

JERRY TAVE i raitim

OL kakau fama long Madang i stat pinis long wokbung wantaim long kirapim wanpela kampani bilong ol yet bilong selim kakau insait long kantri na tu long ol arapela kantri long wol.


Ol fama i rejisterim pinis kampani bilong ol wantaim Invesmen Promosen Atoriti na i wok long painim K100,000 bilong bon fi, em wanpela ol kondisen PNG Kakau Bod i tok ol i mas mekim.

"Dispela bai helpim ol fama long kisim gutpela

prais long kakau bilong ol," Madang Agrikalsa, Laivstok na Fiseris Edvaisa," Paschal Fera i tok.

Em i tok ol kakau fama i save salim kakau bilong ol i go long Agmark wanpela kampani bilong Is Niu Briten provinsel gavman na narapela kampani wanpela bisnis man, Mike Cassell.

Em i tok sapos ol Madang kakau fama i kamapim kampani bilong ol yet, dispela i ken pre-tim dispela tupela arapela kampani na mekim ol i stat baim kakau long gutpela prais.



Amamas i gutpela pasin...

• Ol Skul pikinini na papa bilong ol long Ulatapun Komyuniti skul, inlen Uilgan insait long Bogia distrik. Ol i amamas long man i laik kisim piksa na ol i tromoi han na small i stap.

Japan givim rais masin long ol ples

SAMPELA ol ples long Madang husat i save planim rais nau i ken yusim masin bilong rais long mekim rais bilong ol yet na i no mas go long stoa long baim rais.

Dispela gutpela developmen i kamap bihain long Gavman bilong Japan i sainim kontrak las wik wantaim Madang long givim wanpela rais masin long ol Madang pipel.

Insait long wanpela seremoni long stat bilong dispela mun long Mosbi, Ambaseda bilong Japan, Tatsuo Tanaka i sainim kontrak wanpela kontrak wantaim Mary Lilih, Provinsel kaikai opisa bilong Madang provinsel edministresen long lukim dispela developmen i ken kamap.

Namba bilong ol lokol rais fama long Madang provins i bin go antap na bikpela laik bilong ol pipel bilong Madang long i gat fektori bilong rais. i bin kamap strong tru.

Olsem sevis Japan i givim bilong baim masin bilong wokim rais longna tilim i go long ol ples olsem Yakiba, Usino Bundi, Bogia na Ayawan i stretim bikpela wari bilong ol pipel long ples.

Nau ol i no mas karim ol rais bilong ol na i go long Madang taun long yusim rais masin long taun.

Japan gavman i hop dispela sevis bai kirapim tingting bilong planti moa pipel bilong Madang long planim rais.

Gavman bai putim mani bilong stretim Madang Raikos rot

BEN TAUMAI i raitim

NESENEL Gavman bai skelim sampela mani insait long 2001 baset long stretim Madang Raikos haiwe.

Minista bilong Trensport na Sivil Aviesen, Bart Philemon i tokim ol pipel bilong Tapen tu wik i go pinis taim em i opim Tapen ples balus.

Em i tok, Nesenel Gavman i luksave long dispela rot taim em wantaim Peter Barter i plai long helikopta bilong Mista Barter i go long lukim dispela rot long ai bilong em.

Mista Philemon i tok em i mekim

olsem bikos Mema bilong Raikos i bin askim sampela askim long Palamen long Nesenel Gavman i mas luksave long dispela haiwe na stretim.

Em i tok em i mekim komitmen pinis na gavman bai lukluk long en long stretim.

Ramu Nikel na Kobalt projek em i stap namel long Saidor stesin na Madang taun we dispela haiwe bai ron long en. Olsem na ol pipel husat bai kirapim ol liklik bisnis long sait bilong Ramu projek bai yusim dispela rot. na moa yet long olgeta pipel insait long ol bus na nambis ples insait long Rai Kos distrik.

RAMU SUGAR



The Sweetest Thing

89.9 93 96 98 100



*i tok Amamas long
Porgera Joint Venture long
stap 10-pela yia pinis
long Mining Operesen
insait long Porgera!*

*Yumi sanap strong long
tok ples bilong yumi yet!*

PNG FM LTD Trading as NAU FM, YUMI FM & TOTAL EVENT MARKETING
P.O. Box 774, Port Moresby Papua New Guinea
Ph: (675) 320 1996 Fax: (675) 320 1995 <http://www.naufm.com.pg>

Tenpela voluntia bai helpim komyuniti

YAKAM KELO i raitim

NESENEL Voluntia Sevis (NVS) i amamas long lukim 10-pela volentia i pinisim trening bilong ol long dispela wik long Sen Joseph-8 Mail long Lae.

Ekting Eksekutiv Daireka Margaret Sete i tok amamas long dispela 10-pela volentia long givim bel tru long mekim ol wok helpim long ol pipel insait long komyuniti.

Misis Sete i tok wok bilong volentia em i no isi bikos i gat planti salens tru ol i bungim taim ol i gat wok wantaim komyuniti.

Em i tok em i gat bilip olsem ol volentia bai mekim wok bilong ol bikos ol yet i skelim tingting pinis na wanbel long mekim wok insait long kantri.

Misis Sete i tok bikos long hevi bilong mani ol i kisim tasol 10-pela volentia. Tasol long neks yia ol i laik kisim 30-pela.

Ol dispela volentia bai go long wan wan hap insait long PNG na wok klostu wantaim ol pipel na helpim ol.

Ol sampela bai mekim wok agrikalisa o didiman, forestri, developmen opisa na ol arapela wok moa insait long komyuniti.

Ol volentia i no save kisim gut pe tasol ol i save kisim helpim na sapot long wan wan taim long gavman na ol sapot ogenaísesen.

Betty Billy bilong Hom Afeas dipatmen long Mosbi i kamap long witnesem dispela greduesen na tokim ol volentia olsem opis bilong Hom Afeas i ken wok poroman wantaim NVS long ol rot bilong sapot wantaim long yusim ol risos, mani na ol wokman na ol arapela sevis.

Misis Billy i tok em i amamas long lukim olsem ol volentia em ol Papua Niugini lain stret na i no ol ovasis volentia olsem na dispela em gutpela tru long lukim olsem ol PNG yet i helpim ol pipel bilong en.



Ol susa mekim save stret...

• Ol meri Morobe wantaim naispela bilas bilong ol i kukim ples wantaim stail bilong ol singsing tumbuna bilong Morobe. Dispela i kamap long Goroka So. Foto: SAPE METTA.

Makam Bris na Umsis rot i bagarap

NESENEL rot namel long Makam Bris na Umsis long Lae insait long Morobe provins i bagarap tru long las yia yet i kam inap nau na kamapim bikpela belhevi tru long ol papa bilong ol ka na ol pasindia.

Rot i bruk bruk nabaut na ol PMV na ol praivet ka tu i save kisim taim long ol taia i bruk na ol sampela hap bodi tu i bagarap.

Wanpela PMV draiva bilong Bulolo rot Mista Yapi i autim bikpela belpen tru long dispela hevi.

Mista yapi i tok dispela rot em rot bilong nesenel gavman olsem na nesenel gavman i noken larim dis-

pela bagarap i stap. Ol i mas hariap long stretim.

Mista Yapi i tok em i save draiv long dispela rot olgeta de na em i lukim planti hevi i kamap long ka em i save ranim.

Planti arapela PMV tu i gat dispela ehvi na ol tu i save kros, em i tok.

Dispela rot i go olgeta long Wau na Bulolo taun na em i wanpela olupela rot insait long kantri.

Wantok i traime long kisim opis bilong Provinsel Woks long Lae tasol i nogat man long bekim toktok long dispela samting i stap.

Raon Wara komyuniti askim gavman sapotim

ARI GU DANDEE i raitim

OL KOMYUNITI lida bilong ples Raon Wara insait long Wau Lokol Level Gavman (WLLG) i askim gavman long sapotim strong ol wok bilong spots pilai insait long ol ples bikos spots i save daunim ol lo na oda hevi.

Tupela lida em Sinan Bongi bilong Wod 5 na Yape Anis bilong Wod 11 long WLLG.

Tupela lida i tok ol yangpela pipel i laik pilai bilong amamasim laip bilong ol na long wankain taim tu, ol bai lusim ol samting nogut we ol i save mekim tasim ol i no bisi. Dispela em ol trabel samting we i bagarapim lo na oda.

Tupela lida ya i wokim askim bihain long selebren i amamasim 25 krismas long independens bilong kantri we i bin kamap long ples Raon Wara insait long Wau distrik.

Tupela kaunsil wod i bin bung wantaim na holim ol spot pilai we ol yangpela pipel i bin go insait long en.

Em ol pilai olsem soka bilong ol man, basketbal bilong ol manmeri, volibal bilong ol manmeri na ragbi tas bilong ol man.

Long soka, Greenhill i holim taitol na kamap namba wan taim namba tu prais i go long DJBee, namba tri long Miks Meits na namba foa long ol Guipi. Long basketbal bilong ol man, BSP tim i bin kamap namba wan taim Yarakoi i kamap namba tu na namab tri i go long Miks Meits taim namba foa i go long ol Gupi.

Long basketbal bilong ol meri, ol BSP meri i bin kamap namba wan, Green Hill i kamap namba tu, ol Wapi Sistas i kamap namba tri na ol Miks Meits i kamap namba foa. Ol Eksplorasi i kisim namba wan prais long volibal bilong ol meri na wankain tu long Ragbi tas bilong ol man taim Eksplorasi i kamap namba wan.

NIU
PELA

STRONGPELA TRU

Colgate

Toothpaste bilong PNG Stret!



Strongpela, waitpela helti tit na gutpela smel long liklik prais tasol - nau em bai givim yu Colgate Strongpela Tru Smael.

Bisop Burgess amamas long strongim ol wok i stap pinis

"Mi gat laik long serim laik na marimari bilong God wantaim ol pipel bilong Wewak daiosis na tu strongim wok i stap pinis," Bisop Tony Burgess i tok.

Bisop Burgess i tok long 1967 em i bin kisim odinesen bilong kamap pater Long Maitland, Niu Saut

Wels long Ostrelia. Bihain long odinesen em i bin wok Ostrelia.

Orait long 1972, em i bin kam wok long Lumi peris insait long Aitape daiosis. Sampela yia bihain em i go bek long Ostrelia na i wok long hap i go inap long

1982 em i kam bek long

PNG na i go wok long Wasisi peris long Aitape daiosis.

Em i tok em i wok long hap long 19 yia olgeta. Bisop Burgess i bin wok tu long Kairitem peris.

Taim Papa Santu i makim em olsem wanpela bisop em i bin kirap nogut tru.

"Mi no ting, Papa Santu inap makim mi olsem wanpela bisop. Man mi kirap nogut tru. Tasol mi amamas long kam na wok. Mi lukim olsem em i wanpela nupela wok bilong mekim na mi kisim dispela wok olsem wanpela salens," Bisop Burgess i tok.

Pater Tony Burgess kamap bisop bilong Wewak

OL KATOLIK bilong Wewak daiosis i bin bung long dispela wik Trinde long Wirui peris long 6:30 long abinun long selebretim misa wantaim nupela bisop bilong ol, Bisop Tony Burgess.

Bisop bilong Wewak daiosis, Raymond Kalisz, i bin go pas long mekim misa bilong blesim Pater Tony bilong kamap bisop. Narapela tupela bisop husat i bin mekim misa wantaim em, em Asbisop bilong Mosbi asdaosis, Brian Barnes na bisop bilong Aitape, Austen Crapp.

Moa long 10-pela pater bilong Wewak daiosis wantaim ol bruda, sista, ol le pipel na ol bilip manmeri i bin bung long witnesim dispela spesel

misa. Han Schwemmer, Nunsio bilong Papa Santu, Pop Jon Pol II i no inap kamap long dispela misa tasol em i bin salim seketeri bilong em.

Bisop Kalisz i tok, long belo ol lain i bin kam long dispela misa i bin bung kaikai wantaim insait long daining rum bilong haus misin na bihain ol i bin go bung wantaim long misa.

Em i tok, Helpim Bisop Burgess i no bai wok olsem helpim bisop tasol bilong Wewak daiosis. Nogat. Olsem koedjuta, em bai kisim ples bilong Bisop Kalisz taim em i ritaia. Taim bilong ritaia em long taim Bisop Kalisa i gat 75 krismas.

"Papa Santu i makim em (Bisop

Burgess) pinis long kisim ples bilong mi. Em i no helpim bisop tasol," Bisop Kalisz i tok.

"Mi amamas long apoinmen bilong Papa Santu."

Em i tok Bisop Burgess bai helpim em long lukautim samting olsem 120,000 Katolik pipel bilong Wewak daiosis na tu mekim ol pastorel wok insait long 45 peris bilong daiosis.

Bisop Kalisz i tok Wewak daiosis i gat samting olsem 55 pater. Sampela bilong ol dispela pater i go bek pinis long asples bilong ol. Sampela i lapun pinis na i no inap mekim wok.

Em i tok samting olsem 10-pela peris i nogat pater olgeta.

Man i mas wok long kisim samting ol i laikim, Pater Ambane i tok

GAVANA bilong Simbu, Pater Loui Ambane, i salensim ol pipel bilong Papua Niugini na moa yet ol pipel bilong Simbu long wok hat long lukautim ol yet na maski kamap olsem ol les manmeri.

Pater Ambane i tok pasin bilong ol pipel long go long opis bilong ol lida na ol wantok, o sindaun long pes bilong ol stoa olgeta de na askim long mani bilong baim haus sik, skul fi, dai insait long famili, marit, balus, sip na ka tiket, kaikai na ol arapela samting em i no wanpela gutpela pasin.

Em i tok taim God i wokim man olsem stori insait long Buk Baibel i tok, God i putim man long gaden eden. Na God i tokim man long bosim

dispela gaden. Em i tok insait long Stat bilong buk bilong Olpela Testamen, God i tokim man long wok hat na long tuhat bilong em, man i ken lukautim em yet.

Long dispela as, Pater Ambane i tok, ol pipel bilong PNG i mas lusim dispela pasin bilong stap nating, go long opis bilong ol lida, ol wantok, pren, o sindaun long pes bilong ol stoa o maket na askim long 'fri' mani o ol arapela samting.

"Wanem taim bai yumi lusim dispela pasin," Pater Ambane i tok.

Em i tok ol pipel bilong PNG i mas wok hat, tuhat i mas pundaun long het bilong ol na bihain ol i ken sindaun gut na kaikai long hat wok bilong ol.

PNGCC bai ronim kos bilong ol sios lida long Ampo long narapela wik

SEKETERI bilong ol meri long Papua Niugini Kaunsel Ov Sios, Gwen Tulo, wantaim wan wok bilong em Peter Saroya i redim ol samting bilong ronim wanpela wik woksop long Ampo, Lae long Oktoba 2 i go pinis long long 14.

Misis Tulo i tok samting olsem 30 Sios lida bilong Yunaited Sios, Katolik, Angliken, Baptist, Salvesen Ami, Gutnius Luteran na Evanjelikol Luteran Sios bai kamap long dispela woksop.

Em i tok astinging bilong dispela woksop, em bilong strongim save, tingting na laik bilong ol sios lida long helpim ol long mekim gut wok bilong ol insait long sios.

Misis Tulo i tok wanpela bikpela samting ol lida bai

lainim insait long dispela kos em long painim aut wanem samting ol i gat insait long ol yet, we ol i ken ofaim o helpim ol arapela insait long komyniti.

Em i tok dispela em wanpela we PNGCC i laik helpim ol lida long helpim wok bilong wan wan sios bilong ol insait long kantri.

Man husat bai skulim ol lida long dispela woksop em wanpela Saina man bilong Papua Niugini, Sam Tam.

Misis Tulo i tok PNGCC i gat laik long askim Het Bisop bilong ELCPNG, Dokta Wesley Kigasung, long givim tu sampela skul long sait bilong ronim ol baibel stadi. Em i tok dispela woksop bai i gat ol skul bilong baibel i go wantaim ol arapela skul.

Pater Carlton Grenier i dai

WANPELA Pater bilong Amerika, Carlton Grenier, husat i bin wok long bik bus bilong Bogenvil, moa long 44 yia olgeta i dai long Mande 18 Septemba 2000, long asples bilong em.

Bisop bilong Bogenvil, Henk Kronenberg, i salim bikpela tok sori na tenkyu long olgeta bikpela wok Pater Grenier i bin mekim long makim maus bilong Katolik Sios long Bogenvil na tu bilong ol pipel bilong Bogenvil i go long ol Marist kongrigesen na tu i go long ol famili bilong Pater Grenier.

Em i tok Pater Grenier i bin mekim planti wok long Deomori, Torokina na Kuraio na tu long Sauten Hailens na Solomon Ailans. Long taim bilong pait long Bogenvil, Pater Grenier i no bin ronowe lusim Bogenvil. Nogat. Em i bin wok long Kuraio peris i stap.


Bisop Kronenberg i tok Pater Grenier em wanpela man bilong wokabaut stret long go long ol ples olgeta taim na autim gutnius.

Em i tok Pater Grenier i bin pait long ami long Wol Woa II long Papua Niugini. Bihain taim woa i pinis, em i go bek long Amerika na skul long kamap pater.

Orait long 1954, em i bin oden pater na long 1955 o 1956 em i bin kam wok long Bogenvil i go inap long 1999 taim em i ritaia na i go bek long Amerika.

Bisop Kronenberg i tok 10-pela de bipo long em i dai, (Fraide 8 Septemba, 2000, em i selebretim gold-en jubili bilong em) na bihain God i singautim em i go kisim malolo bilong em bilong oltaim.

Bisop Kronenberg i tok Pater Grenier i bin gat 76 krismas olgeta bipo long em i dai.




• Asbisop Brian Barnes, Bisop Raymond Kalisz, Bisop Francisco Sarego, Vika Jenerel Pater Gregory Tianni na wanpela misinari i sindaun malolo long haus kaikai bilong ol misinari long Wirui peris, Wewak, las yia taim ol i redi long selebretim bikpela misa bilong Asbisop Leo Arkfeld. Foto: WENCESLAUS MAGUN.



Stedim pulap kapsait

• Olimpik Stedim long Sidni we inap long kisim 110,000 pipel long en. Nau Stedim i pulap kapsait long ol manmeri na pikinini bilong Australia na ol arapela hap bilong wol husat i stap lukim pilai ya.

Andy Wilding na Greg Johnson na Alex Cook em tripela pilai bilong Inglan i penim pes bilong ol na ol i amamas long stap insait long dispela bikpela pilai. *Piksa i kam long Weekend Australian niuspepa.*



Kain ron i gat kik!

• Top nem plialia meri na asples Aborijini bilong Australia Kathy Freeman i ron long 400 mita ron na kamap namba wan winim ol arapela meri em i resi wantaim long en. Em bin winim gol medal taim em bin pinisim ron pastaim long taim mak 51.63 sekons. Kathy i putim su long makim kala bilong ol Aborojini pipel na dispela em long ret, yelo na blek. *Piksa i kam long Weekned Australian niuspepa.*




Pul i go!

• Inglan na biknem long rowing o pulim bot Steve Redgrave i go pas long resis.



Lukaut long em!

• Pyrrhos Dimas nesene! hiro bilong Greece i wokim trening bilong em long salens bilong weit lifting. Dimas wantaim 29 kris-mas i winim pinis Olimpik Gol medal tupela taim long Baselona (Spain) na Atlanta (Amerika) Olimpik pilai. Dimas i no man nating em i wanpela strongpela man husat i resis long winim gol medal na i no silva o brons.



• Ol meri Australia autim tiket bilong ol meri Rasia Wata Polo em wanpela pilai we ol i resis long en long Olimpiks. Ol meri Australiai bin strong tumas na winim ol meri Rasia. Watson bilong Australia i laik tromaom bal na abrus long difens bilong meri Rasia. *Piksa i kam long Weekend Australian niuspepa.*

Amerika i kamap namba wan long winim ol pilai long Olimpiks

Sidni Australia i wokim das taim Namba 27 wol pilai Olimpiks i go het long dispela taim. Na tude em i namba 13 de, wik tu long dispela bikpela pilai we ol kantri long wol i stap long en na stap insait long ol kain pilai.

Olimpiks Stadium long Sidni inap long kisim 110,000 pipel na long olgeta de, em i wok long pulap gut tru. Pilai bai i kisim 16-pela de olgeta. Ol ripot i tok ol pilai i wok long go gut tasol na ol pilai long ol wan wan pilai i wok long brukim ol wol na Olimpik rekot. Ol resis long swimming, jimnastiks na atletiks i wok long kamap strong na i kam inap long Sande 24 Septemba, ol pilai i resis strong na winim ol medal long ol kantri bilong ol. Wanpela yangpela man Holan husat i gat 22 kris-mas em Peiter van den Hoogenband i kamap strong tru na em i

kamap olsem man i gat namba long Olimpiks na tu long ples bilong em Holan o Netherlens.

Peiter i winim pinis tupela gol medal na tupela brons na i gat bilip em bai winim moa yet long ol arapela resis i kam. Wantaim nara-pela meri swima Inge de Bruijin, husat tu i wiinim tupela gol na wanpela silava, tupela i apim kantri bilong ol long swim pilai resis na nau Holan i kamap olsem wanpela biknem kantri i gat kik tu long spots. Long ples yet bilong em Holan, ol tisa i stapim ol lesan na putim telivisen taim Peiter i resis na ol sumatin i ken lukim em.

Peiter i stap yet long haus bilong ol papama-ma bilong em long Geldrop, Holan. Gelpren bilong em Minouche Smit na bubu bilong em i bin kam tu long Sidni wantaim em na ol i wok long lukim em i resis i stap na ol i

givim bikpela sapot tru long en.


Smit i bin wanpela foma Olimpik swima tu. PSV Eindhoven em klab we i kamapim Olimpik sempion swima Peiter, Smit, Bruijin na ol arapela moa Olimpik swima bilong Holan. Amerika i wok long go pas long winim ol medal wantaim 51 olgeta. Twenti bilong ol em gol, 12 silva na 8 brons. Saina i kamap namba tu wantaim 41 we 17 em ol gol, 12 silva na 12 brons. Frans i kamap namba tri wantaim 30 medal. Twelpela em ol gol, narapela 12 em solva na siqs em brons. Rasia i kamap namba foa wantaim 37 medal we 12-pela em ol gol, nain silva na 18 brons. Host kantri we pilai i kamap long en em Australia i kamap namba faiv wantaim 39 medal we 10-pela em ol gol, 18-pela em silva na 11-pela brons.



Kamon ol meri, taitim bun long ron!

• Stat bilong 100 mita ron bilong ol meri.

Rait i go long lef em top meri rana long dispela resis na wina bilong gol medol Marion Jones bilong Amerika, Monica Afia bilong Ghana husat i bin kamap namba tri na Marina Trandenkova bilong Rasia husat i bin kamap namba tu.



I no manki nating, em sempion bilong swim long Olimpiks!

• Yangpela Hoogenband i amamas na smail taim em i winim 200 m fristail long lan Thorpe bilong Australia. Long (daunbilo lep) em gelpren Minouche Smit na bubu man bilong em (Peiter). Daunbilo (antap) em gelpren Smit i krai wantaim amamas taim em i lukim long TV olsem Peiter i win. Holan i kamap olsem supasta bilong swim resis wantaim Peiter van de Hoogenband. Em bin winim biknem swima bilong Australia lan Thorpe long 200 mita fristail. Ol pipel bilong Australia i wok long ting olsem Thorpe bai i wintasol manki Holan i kamapim das. *Piksa i kam long Weekend Australian niuspepa.*





• Ol stail mangi bilong Lae. Anda 13 tim bilong Taraba (Lae).



• Straika bilong Lae (9) i tok klia long mi taim ol i bungim Bavaroko U/17 girls long soka salens.




• Tupela susa long Lae i ialk trikim ol meri long Pot Mosbi.




• Namel lephan: Anda 17 tim bilong Evedahana Praimeri skul.

• Daunbilo lephan: Referi i mekim sampela toktok bihain long em i givim gol i go long Bavaroko Anda 17-girls tim.

• Daunbilo raithan: Susa ya i mas painim gol pos ya. Em i no hetim gut bal.






Anivesari bilong **PORGERA**



SAPLIMEN BILONG WORD PUBLISHING



• Evert van den Brand.

Toktok i kam long Jenerel Menija bilong Porgera Main

Jenerel Menija bilong Porgera Porgera Joint Venture Evert van den Brand i amamas long ol samting main mekim insait long 10-pela yia.

Mista Brand i tok olsem taim projekt i bin stat i bin hat bikos Porgera i bin stap long bik bus stret na i bin hat long mekim wok.

"Taim mipela i bin stat mipela i wok long wanpela hap we ol manmeri i no bin gat i nap skul na i no bin andastendim wok bilong main. Tasol nau dispela i wok long senis bikos long edukesin ol man meri wok long kisim na em i halivim ol long save hao main i save wok," em i tok.

Mista Brand i tok dispela i bin halivim tu bikos nau ol i ken wok bung wantaim ol papa graun.

Taim em i kamap GM bilong Porgera main Mista Brand is bin lukautim ol sampela bikepla projekt we i bin lukim ol papa graun na ol wokman meri bilong main i benifit long en long sait bilong helt, edukesin, enivaironmen na bisnis developmen.

Namba wan samting em bin mekim em long senism rosta o ol taim ol wanwan wok man i save wok. In nap long tupela yia ol i kamapim wanpela agrimen wantaim ol papa graun long flai in na flai aut. Dispela agrimen em ol i bin pasim tok wantaim ol provinsel gavman na ol nesanel gavman long developim wanpela nupela taun we ol wok bilong main i ken stap na wok.

"Mipela i stat long apim trening na lokelising program na mipela i laik impruvim ol skils bilong ol lokel wokman. Mipela i statim ol Filariasis na Malaria prevensin program long ol man husat i save stap klostu long ol lain wara. Mipela i mekim dispela wantaim provinsel gavman na Wel Helt Ogenaisesis.

Tex kredit skim i senis na nau mipela i wok long lukluk long stretim ol rot wantaim ol arapela infrastraksa insait long provins kain olsem edukesin, (ol klas rum na haus bilong tisa), health (ed pos) na lo na orda (kot haus, plis

bareks).

"Mipela is statim tu Infrastraksa Developme Program. Dispela em PJV i wok long fandim lor kamapim planti infrastraksa long provins. Lor sait bilong pablik akauntabiliti long envairome mipela i kamapim PEAK komiti long was lon dispela. Long dispela komiti i gat ol lain bilon gavman, ol NGOs na ol arapela saveman.

Porgera i stap long bik bus we i no save gr planti sevis i kam long gavman. Long dispela a em mipela i wok long tingting strong putim mar i go long edukesin, helt, na lo na oda.

"Mipela i sapotim ol plis na ol tisa na mipela kamapim ol haus bilong ol. Dispela em bi mekim na ol bai laik wok long ol kain hap olser Porgera we i longwe stret. Long sait bilong kor pensen bilong ol lenona mipela i kamap pinis i wei long baim ol.

"Mipela i wok long kisim ol save man i egirkalsa long lainim ol as ples. Dispela progrer i wok wantaim ol meri."

Porgera Main - 10-pela yia i lus 'Mipela i ke long futsa'

Main i stap we

PORGERA Gol Main i stap long bik bus stret bilong Enga Provins long Hailens bilong Papua Niugini.

Dispela main i stap olsem 225 Kilomitas west long Mt Hagen (Western Highlands) sapos yu bihainim rot na i 650 Kilomitas long Lae we ol i save kisim planti long ol saplais bilong ol.

Porgera em i ples bilong ol Ipili pipol na ol i narakain liklik long ol Engans na ol Hulis. I gat olsem 13,000 Ipilis husat i stap long Porgera na i gat 6,000 mo i stap long Paiela ples.

Dispela main ol i mekim antap long ol bikpela maunten na i stap olsem 2,7000 mitas antap long sol wara o si levul. Long wanpela yia ol i save kisim 3.5 metres long ren.

Bifo taim main i no stat yet Porgera i bin wanpela liklik stesin wantaim sampela stoa na wanpela gavman opis. Ol pipol long hap i save wok gaden na mekim ol liklik aluveil maining.

Nau yet populesen bilong Porgera i gro bikpela pinis na i gat wanpela nupela tain ol i kamapim long Paiam.

PJV i mekim pinis wanpela nupela ples balus long Kairik we ol balus i save flai i go i kam long Porgera.

Ol i painim gol

Namba wan taim ol i bin painim gol i bin long 1938 taim eksplora Jim Taylor bin go long hap. I no bin gat bikpela maining i kamap tasol long 1948 Taylor i bin go bek na aluviel maining i stat. Driling i bin stat long 1970s.

Maining Developmen Kontrakt bilong Porgera projekt em gavman i bin sainim wantaim ol developas long Mei 12, 1989 na ol i bin givim wan-

pela spesol maining lis. Konstraksen i bin stat bin ol i bin mekim sainim.

Namba wan gol ba em ol i bin kam-saitim Ogos 5, 1990, na bihaim long 15-pela mun konstraksen bilong projekt i stat.

Onasip Intares

- 50% Placer (PNG) Pty. Limited (Exploration and Development Manager) (Placer Dome Asia Pacific has a 100% interest in Placer (PNG) Pty. Limited)

- 25% Goldfields Porgera Limited (wholly owned subsidiary of Goldfields Limited of Australia)

- 15% Orogen Minerals Limited (51% owned by the State of PNG)

- 10% Mineral Resources Porgera Pty. Limited (owned 50% by the State of PNG and 50% by the Enga Provincial government and local landowners)

Prodaksen

- 1999: 754,754 ounces of gold

- 1998: 726,808 ounces of gold

- 1990-1999: 9,054,197 ounces of gold

Prodaksen kos (wantaim ol royetti)

- 1999 totel kos: \$295 per ounce

- 1999 kes kos: \$175 per ounce

Ore Risevs (wantaim dilusen)

long Desemba 31, 1999, ol ore resevs i bin gat 10,730,000 ounces gold.

Laip bilong main

17 yias.

Maining

Open pit

ORCHID LODGE LTD

*Congratulations
PORGERA JOINT VENTURE
on your 10 years of operations.*

KOL ACCOMMODATION

Double - K85.00

Single - K75.00

More than 10 people - 20% Discount.

Children under 10 - 50% Discount.

Children under 4 - Free

MEAL COSTS

Dinner K10.00 - K25.00

Lunch K 8.00 - K15.00

Breakfast K 8.00 - K15.00

Enquiries call Peter Piaoen on

Phone: 542 2087/547 1253 Fax: 547 1001

Home of PNG orchids. Magnificent view from 9,000 feet above sea level. Overlooking Lai and Ambum Valley-Lodge on top of the world.



WORKWEAR

By FRG CLOTHING LTD.

CORPORATE, UNIFORMS, CASUAL CLOTHING AND SCREEN PRINTING

Proudly Made in PNG by Papua New Guineans

Phone: 852 2833

852 2075

852 2550

Facsimile: 852 3110

Email: frglis@datec.com.pg.

*Congratulates Porgera Joint Venture
on it's 10th Anniversary.*

Mot Place, P.O. Box 449, Madang



Anivesari bilong **PORGERA**

SAPLIMEN BILONG WORD PUBLISHING



Crocodile Catering i go long bik bus

OL lain husat i save mekim katar- ing o kukim kaikai bilong PJV, Crocodile Catering i amamas long ol wok em i mekim pinis long Porgera na ol i gat ol plen long inves long hap.

Taim ol i kisim pinis kontrakt wantaim main ol kamapim nupela opis bilong ol nupela taun ol i kolim long Paiam.

Wanpela yia i lus pinis nau long taim Crocodile Catering i bin muv i go long Porgera. Long Paiam ol i save ronim wanpela supamaket, kaik kai ba. wanpela holisel, wanpela bekeri, na wanpela liklik maket.

Jenerel Menija Rick Bert i tokaut olsem taim ol i bin muv i go ol i painin hat bikos long nupela investmen bilong ol long Paiam. Tasol em i bilip olgeta samting i olrait na i luk olsem ol bai mekim ol profit long dispela yia.

Mista Burt i tok olsem ol i bin laik bilding gen kanpani na stretim nem bilong na dispela nupela invesmen i luk olsem wanpela gutpela investmen bilong Crocodile Catering.

"Mipela is amamas long tok

olsem Crocodile Catering (Porgera) em bilong ol manmeri insait long Papua Niugini bikos em i kam aninit long Nesanel Providen Fand.

"Mipela i laik resis wantaim ol arapela bisnis na planti man husat i raun i kam long stoa bilong mipela i lukim olsem ol prais bilong mipela i go daun na i winim tu sampela long ol bikipela hap olsem Mosbi. Crocodile Catering i sanap bihainim dispela nupela investmen.

Em i tok olsem Nesensel Providen Fand i bin givim mani long kamapim dispela bilding bilong ol na i lukautim, holisel, bekeri, na supa maket. Kos bilog dispela invesmen i bin K4.5 milion.

Mista Burt i tok olsem planti ol kontraktas i save kam na ol i save tek of taim ol i painim hat. Em i tok olsem dispela nupela propati bilong Crocodile Catering em bilong ol pipol na bai gro taim Paiam i kamap bikipela. Em i tok olsem Crocodile Catering i bihainim promis bilong long kamapim wanpela opis long Paiam na na

stap yet. Ol i no save kukim kaikai ol i save givim ol skul toktok long ol lokol bisnis long sait long buk kiping. Ol i save givim gutpela skul toktok tu long ol papa graun bilong main long yusim gut mani ol i save kisim long ol royelti.



"Mipela tu i komited long trenim ol manmeri long PNG."

Arapela projekt bilong ol em wanpela liklik maket we ol as ples meri i save salim ol kaikai bilong gaden.

Ol i save traim long baim planti lokol na gat gutpela nem wantaim ol lokel produsas na ol menufek-sares.


• Antap: Ol wokman bilong bekeri i mekim ol bret na scon i stap.

• Ol wokmeri long nupela supamaket bilong Crocodile Catering i stap long Paiam.




IPI/CROCODILE JOINT VENTURE

IPI/Crocodile Joint Venture Catering, caterers to the Porgera Gold Mine, would like to take this opportunity to congratulate the PJV on their 10th year Anniversary in the Porgera Valley.



The Management & Staff of IPI/Crocodile Joint Venture



Anivesari bilong **PORGERA**

SAPLIMEN BILONG WORD PUBLISHING



J&U Sandblasters

OL ain i save bagarap hariap tru taim wara i pas long ol o ol i stap long graun. Na long ol ples olsem Porgera we ples i kol tru, ol ain we i stap long bikpela masin i ken bagarap hariap tru sapos ol i no klinim dispela ol masin hariap tru.

Wanpela rot bilong klinim ol kain masin olsem em ol i kolim sand blasting. Sand blasting em wok we masin i save pamim strongpela win wantaim ol sampela pipia wasan i go long ol samting em ol laik klinim long en na em save wokim wok bilong klinim ol.

Taim ol lain i klinim ol ain pinis, ol sekim sapos sampela hap i bruk nabaut na bihain ol i save penim na yusim ol ken.

Long Porgera, wanpela kampani em i save wokim dispela wok em J&U Sand Blasters. Dispela em kampani em Jose Umbu na kandre bilong em Umbu Pausa i save ronim.

Umbu i save wok wantaim faif-pela wokman we em yet i bin trenim long klinim ol masin na traipela mama bilong ol trela we i save karim ol ston long main.

Save bilong wokim dispela wok em Umbu i bin kisim taim em i

joinim Bougainville Copper Mine long 1972 olsem wanpela wokman bilong stretim ol samting we i bruk. Em i wok long hap i go inap em kamap olsem wanpela fomen.

Em wok long Bougainville olsem 13 krismas olgeta na bihain em lusim na go wok long Ok Tedi we em wokim wok sand blasting long fopela krismas olgeta.

Bihain long dispela, em lusim Ok Tedi na go long Porgera we em joinim PJV na wok long tupela krismas. Long 1995, he lusim PJV na statim kampani bilong em yet we i save wok ol wok olsem sand blasting, penim ol kar na masin na rubber lining. Em i stap olsem wanpela kontrakta long PJV.

Ol ston we masin i memem i save ron long ol paip. Insait bilong dispela ol paip igat ol raba we ol ston i save ron antap long ol. Taim dispela ol raba i bruk, lain bilong Umbu i save stretim ol.

Long nau yet J&U Sand Blasting i wok long painim ol nupela ples long go wok long en olsem long Ramu long Madang na long Tolukuma long Setrel Provincs.

J&U Sand Blastest i gat 9-pela wokman.

Porgera na ol komuniti bilong ol

KOMUNITI Efes dipatmen bilong PJV i gat olsem 125 wokman meri husat i save bosim ol kainkain sosel sevis.

Dispela dipatment i wok long gro na olgeta taim main i save go bikpela. Main los kontrol dipatment i save mekim bikpela wok long sait bilong trenimol risev plis na mekim ol medikel sevis na ol sefti program.

Long 1998, PVJ i bin stat long lukluk long sastenabel menj-

men sistem wantaim ol ekstenel menjimen sistem (olsem ol lain bilong Distrikt edministresin). Ol man i wok long luksave long ol komuniti developmen program olsem long helt, na edukesen.

Long 1999 Porgera Distrikt Sastenibiliti Plen (PDSP) i bin kamap long halivim ol komuniti long wok bing wantaim.

PDSP i luksave long developmen bilong komuniti na i luksave olsem olgeta man meri i

mas wok wantaim sapos ol i stretim ol liklik wari.

Wanpela gutpela eksempe em long dispela em empawamen bilong ol meri olsem ol individuel na ol arapela sosel grup. Ol mekim dispela wanpela grup i bin kamap em ol i kolim long Porgera Women's Association.

Bisnis Developmen ofisa bilong PJV na wanpela meri egrikalsa ofisa i save halim ol meri long ples. Ol i lainim long ol kainkain samting olsem ol kes krops, at na krafts, na hao long kamapim ol liklik bisnis.

Ol i lainim ol tu long lukautim ol rebit na ol kakaruk long halivim ol wantaim abus.

Ol i save ronim ol woksop tu long lainim ol meri long ol samting bilong helt, edukesen, na ol sosel samting.

Komuniti Efes dipatmen bilong PJV i bin statim wanpela womens raits awenes kenpein long 1999. Ol i bin mekim wantaim distrikt edministresin na wanpela NGO, ICRAFT.

Dispela kempein i bin lukluk long ol hevi ol meri i save bungim na i soim ol hao long stretim. Bikos dispela program i bin ron gut PJV i tok olsem ol bai sapatim yet



• PJV wantaim ol wokman bilong ol i save halivim ol lokal komyuniti.

J & U Limited

100% WHOLLY NATIONAL OWNED

Congratulates Porgera Joint Venture on its 10th Anniversary



Specialising in:

- RUBBER LINNING
- SANDBLASTING
- SPRAY PAINTING

J & U Limited,

P.O. Box 395 Wabag, ENGA Province
Phone: 547 4056 Fax: 547 4055




Anivesari bilong **PORGERA**

SAPLIMEN BILONG WORD PUBLISHING


WE CARE

• Ol dairektas bilong PCJS. Beksait: Peter Lawek, Richard Kisa, Tom Puluksu na Chris Seider. Fran: Nelson Akiko na Be Pepo.



Kampani bilong klinim ol opis

Raymond Palangat i raitim



PORGERA CAMP & JANITORIAL SERVICES LTD.

Congratulations

PORGERA JOINT VENTURE on your 10 years of operations

Porgera Camp & Janitorial Services Limited is proud to have been associated with Porgera Joint Venture as its specialist cleaning/Janitorial and housekeeping of 1269 accommodation rooms and general mine site ablution offices and etc at Porgera Mine sites.

We look forward to continuing this partnership in the years to come.

BE PEPO
Managing Director

OLSEM 10-pela krismas i go pinis, wangepela kampani we i bin gat fopela wokman long en i bin statim wok bilong ol long klinim ol opis insait long Porgera. Ol nogut ya i no bin ka bilong halivim ol long wokim wok na save wokabaut long lek long wokim wok.

Long dispela taim i kam inap nau, dispela liklik kampani i bin kamap kamap i go bikpela na nau nem bilong dispela kampani em Porgera Camp Janitorial Services (PCJS). PCJS nau i gat 170 wokman na planti ka bilong halivim ol long wokim wok bilong ol.

Dispela kampani we Nelson Akiko i bin statim i save wokim ol wok olsem klinim ol kem na wasim na stretim ol klos bilong ol wokman.

Antap long dispela, PCJS i save wokim gaden bilong ol lain husat i gat haus long Porgera, kilim ol binatang long gaden long marisin, polisim ol flo bilong ol haus na tu save klinim ol ples bilong sindaun na malolo.

Ol sampela lain husat i go pas long ronim dispela kampani em Peter Lawek, Richard Kisa, Tom Puluksu, Be Pepo, Chris Seider, Peterson maso, Mary Akiko na Jack Wai.


PCJS tu save halivim ol komyuniti long Porgera. Ol i save givim ol samting long ol yut grup, ol sios grup na ol spot tim. Ol bilip olsem long kain pasin olsem, ol i tilim ken mani na samting em ol i kisim long wok ol i save wokim long Porgera. Tu planti bilong ol wokman bilong ol i bilong Porgera yet.

"Sapos mipela halivim ol komyuniti, mipela bai stap yet," ol wokman bilong kampani tok.

Nau PCJS i wok aninit long namba tu kontrak bilong ol na ol i wok long toktok wantaim ol lain long main long sainim nupela kontrak bilong namba tri taim ken.

Long wankain tasol, PCJS i wok long traim long kisim kontrak long Ramu Mine long Madang na tu long Mt Kare.

Planti manmeri i amamas long wok em PCJS i save wokim na tok hatwok bilong ol i wokim ol ples i luk wankain olsem ol otel nabaut.



3 ROSES FLOUR

Nau i gat bikpela nupela wei long wokim olgeta feveret kaikai bilong yu. Bikos nupela 3 Roses Flour i kamap pinis long hia.

3 Roses Flour em i PNG flour wei i gat teist, gutpela velu na gutpela kwaliti.

3 Roses Flour em ol lain bilong *Tablebirds* i wokim long nambawan flour fektori em ol lain PNG i papa long en.

Em i gat gutpela teist bikos ol i wokim wantaim ol gutpela samting..

Na bikos mipela i wokim 3 Roses Flour long PNG kondisen, olsem na em i ken wokim yu kuk longpela taim.

Bihain sekim velu, bai yu painim out olsem 3 Roses Flour i gat gutpela velu taim yu bakim. Traim tu nupela Skon flour bilong mipela. Olgeta samting bilong wokim skon i stap pinis insait long paket, olsem na yu putim wara tasol. Em i isisi. Ok long wokim gutpela Skon long olgeta taim.


So nau i gat nupela flour. Lukluk long ol nupela 3 Roses bek long stoa klostu long yu. Bai yu painim ol long kainkain sais olsem 500g, 1kg, 2kg, 2.5kg, 5kg, 10kg, 25 kg na 50kg bek.



**PNG
MADE**

*Gutpela teist, gutpela
velu na gutpela kwaliti.*





• Deputi Sait Menija Dave Steven.

Dyno Nobel i save tingim sefti

SEFTI em i namba wan samting ol lain bilong mekim ol bom long Porgera Main, Dyno Nobel i save bihainim.

Ofis bilong ol i stap antap long ol maunten na i lukluk kam daun long main. Ol i save wok hait na save was gut tru long wok bilong ol.

Dyno Nobel i bin statim gen wok bilong ol bihain long bikpela birua i bin kamap long 1994 long olupela plen bilong ol we i lukim 11-pela man i bin dai long dispela taim.

Olpela plent bilong ol nau ol i sanapim warpela memorial sten long makim ol dispela man husat i bin dai long dispela taim.

Deputi sait menija David Stephen i tok olsem Dyno Nobel i bin lainim planti samting long dispela birua i bin kamap long 1994 na ol i save tingim sefti olgeta taim.

Dave i bin laki liklik bikos em i sapos long stap long dispela plent sait taim dispela birua i bin kamap tasol em i bin stap yet long Kens, Ostrelia long dispela taim.

Ol man i no save go nating long opis bilong Dyno Nobel. Ol visita na ol bilong Dyno wokman wantaim i mas go pastaim long ol sekuriti sek na ol bai i mas sain in pastaim.

Wok bilong Dyno em long saplaim PJV wantaim ol bom long blowim up ol ston.

Ol i save kisim ol matirels bilong ol i kam insait long main na ol yet save mekim ol bom bilong ol. Ol i save mekim dispela nogut ol man nogut i kisim ol bom bilong ol na yusim.

Kampani i wok long sapatim ol Papua Niuginiens wantaim lokelis-




• Wokman bilong Prodaksen Londe Speik.

esin program bilong ol. Em nau ol i wok long trenim ol PNG man meri long lukautim ol bikpela posisen long kampani.

Warpela long ol em Londe Speik husat em bilong Enga provins yet. Bipo em i bin kam long em i no bin gat save long mekim ol bom. Tasol em i lain pinis na i amamas long Dyno long kisim em. Em i wok long tren long posisen bilong prodaksen menija.

Narapela man em John Selou husat em hap Morobe na Manus husat i stap olsem asiteni menija. Ol i wok long trenim John bai kamap olsem sait menija bihain.



• Asisten Sait Menija John Selou.

Hastings Deering



Congratulates

PORGERA

JOINT VENTURE

on it's

10th Anniversary

Hastings Deering



FOR SALES AND ENQUIRIES

Port Moresby
Phone: 325 6422
Fax : 325 0774

Tabubil
Phone: 548 9045
Fax : 548 9155

Lae
Phone: 472 2355
Fax : 472 1477

Rabaul
Phone: 982 1244
Fax : 982 1129

Gaidakwa Pty Ltd

Sustainable Development Solutions

P. O. Box 157, Alotau, Milne Bay Province, Papua New Guinea
Telephone: 6410197/5478874 Facsimile: 6410197
email: HYPERLINK mail to: guy@daltron.com.pg

Gaidakwa Limited's

Sustainable Development Solutions

is proud to be associated with the Porgera Joint Venture in contributing towards it's sustainability programmes.

*Gaidakwa congratulates the PJV
on it's 10th Anniversary and
wishes it all the best in its
remaining years of operation.*

Specialised in sustainable development and innovative solutions, education, socio-economic planning, budget and project preparations and multimedia .



Anivesani bilong PORGERA

SAPLIMEN BILONG WORD PUBLISHING



Aisi Bishman i laitim Porgera

AISI Bishman i bin stap wantaim Porgera main long stat yet na ol i stap yet wantaim ol.

Long taim ol i bin stat ol i save putim ol kebel bilong pawa long olgeta hap long main sait. Ol i no save wok tasol long main, ol i bin karim pawa i go long nupela taun long Paiam.

Nau yet Aisi Bishman i

save mekim ol arapela wok olsem metel weks, boila meking, plaming na kapentri.


Fomen bilong ol long Porgera Bob Martin i tok ol save laik kisim ol ol papa graun long wok wantaim ol tasol i no gat planti tredsmen na ol isave kisim ol man long arapela provins.

Mista Martin i tok olsem Aisi Bishman bai stap na

wok wantaim main inap em i pinis.

Em i tok olsem ol i save wok gut wantaim PJV na i amamas tasol long wok wantaim ol long ol futsa projekt.

Aisi Bishman i no save wok tasol long Porgera, ol i save wok long arapela main tu kain olsem Lihir, Tolukuma na Mt Kare.



• Nupela satelait bilong Porgera i stap long Palam taun.

Aisi-Bishman
Contractors congratulate the
PORGERA JOINT VENTURE
on their 10th Anniversary
and are proud to be
associated with this world
class operation.

> *Electrical, Mechanical and Instrumentation Contractors.*

ALLAN BRADLEY



SIEMENS

Telephone **325 3944**

Facsimile (675) 325 0005 After Hours 325 3570, 323 9744
 or 326 0562 Mobile 693 8650 Gabaka Street,
 Gordons PO Box 1516 Boroko



AISI-BISHMAN
CONTRACTORS

Porgera i gat satelait fon!

Raymond Palangat i raitim

PORGERA igat telefon eksens (telephone exchange) bilong ol yet. Na dispela telefon eksens i bringim namba bilong ol kain samting olsem insait long PNG i go kamap 12.

Prais bilong telefon eksens em ol lain long Porgera kisim em K1.5 milien na wok ol wokim long putim dispela telefon eksens i bin stat yet long mun Epril long namba faif (5) de long 1999. Long dispela yia, ol i bin pinisim wok na opim nupela eksens.

Long taim ol opim eksens nupela yet, ol i save salim walis tasol namel long Porgera na Paia insait tasol long Enga Provins.

Eksens masin em ol yusim long hap igat samting olsem yau (antennae) we i save pulim ol toktok na walis we i kam yet long Pot Mosbi long narapela kain masin olsem we i save stap long Boroko.

Long mun Ogas, namba 17 de, ol i bin salim walis long Boroko i go long Porgera. Long dispela ol i lukim olsem toktok i kamap klia gut tru na ol lain long Telikom i ting olsem bihain taim ol yusim dispela eksens i go, ol bai i no inap painim sampela hevi long hap.

Dispela telefon eksens em ol putim bambai sevisim ol lain long PJV, Porgera nd Paiam.


Ol lain husat i nogat telefon na laik pulim telefon lain i go long hap bilong ol i ken toksave long Telikom opis long Mt Hagen.

Bipo ol lain long Porgera save yusim wanpela trensmita long Mt Alupai tasol bihain taim ol rascal i bin stilim ol samting we i save wokim trensmita wok, ol lain long Porgera kirap na lusim dispela na kalap long satelait sistem.

Wanpela wokman bilong Telikom bai stap long Paiam long halivim ol wokman long pulim telefon i go long haus na bisnis bilong ol. Dispela wok em bai stat long mun bihain.

Long nau bihain long Porgera i bin kisim dispela telefon eksens namba bilong ol telefon lain em ol PJV save yusim long kisim ol telefon kol long ausait i go antap long 30. Bipo ol i bin gat faipela lain tasol. Namba bilong ol telefon lain i ausait tu i go antap na i sanap long 16. Bipo i bin gat faipela tasol. Dispela i wokim na nau i nogat hevi save kamap taim yu ring i go long hap.

Dispela telefon eksens bambai halivim gut tru ol lain long Porgera.



iPi Investment, Kampani bilong ol papa graun

TAIM main i bin laik op ol lain bilong PJV i bin singaut i go long ol papa graun long kamapim ol bisnis na ol i gen wok wantaim mani.

Wanpela long of dispela kampani bilong ol papa graun em IPI. Dispela em i bikpela kampani stre.

IPI Porgera Investmen

Long 1983 Porgera Joint Venture i bin halivim long statim Ipi Porgera Investment Limited (IPI). Ol i bin stat wantaim wanpela Haus Piksa na wanpela Sekuriti kampani. Bihain taim olsem 3,000 papa graun bilong Porgera na Pailea ples i bungim ol mani bilong ol na ol lonsim nupela kampani bilong ol.

Ol dairekta bilong i bin gat dispela tingting olsem pasin bilong mekim bisnis i bin nupela long Porgera na i bin kamapim wanpela mama kampani long lukautim olgeta arapela bisnis.

Taim kampani i go bikpela ol i kamap ol patna wantaim long sampela jon vensa olsem rot konstraksen (Pangia Constructions); ol stoa (Sullivans), catering servis (Poons), gol dredging (Porgera Gold Dredging), konstraksen (Kiluwa Trading) na helikopta servis (Pacific Helicopters).

Namba wan tingting bilong kampani em long halivim wantaim developmen bilong main.

Ol dairekta bilong na menijmen bilong kampani i hamamas olsem kampani givim wok long 120 man long Porgera na i save wok wantaim ol arapela bisnis bilong ol.

Ol bisnis bilong ol

Porgera station -

Mountain Lodge, accommodation and meals
Ipi Supa Stoa, supermarket retail and wholesale
Kai Bar fi at the Supa Stoa
Hari Hardware, retail hardware
Service Station, fuels, lubricants, etc
Technical Services Division
Welding, fabrication, construction
Joinery, furniture, maintenance
Upholstery, furniture, manufacture
Concrete blocks - manufacture
Rental houses, workshop, plus PNGBC building

Porgera Joint Venture

Mine Site Fuel, diesel to non-PJV vehicles
Bus Hire, three buses service PJV employees
Ari Security, mine perimeter security

Ol Join Vensas


IPI Crocodile 50% venture save mekim catering bilong PJV
Mountain Transport 100% traking kampani
Mountain Fuel Freighters, 50% venture transports fuel
IPI i amamas long wok kostu wantaim ol locel bisnis olsem Porgera Joint Venture, Porgera Development Authority na Paiam Management Company. Dispela kampani i bin kamapim ol stil frem bilong mekim ol nupela haus long nupela Paiam taun ol i mekim ol tebol, sia, na kabod bilong ol nupela haus, ol i mekim ol steps bilong ol na ol keten tu.

IPI i baim 100% dividen o win moni i go pinis long ol se holda bilong ol. Dispela i soim olsem kampani i redi long wok insait long nupela milenium.

TNT Air Cargo Congratulates PORGERA JOINT VENTURE on the 10th Anniversary of it's operation.

TNT Air Cargo is proud to be associated with PORGERA JOINT VENTURE during this period and is committed to a continuation of services.

For your courier, airfreight and customs clearance requirements please contact your nearest TNT Air Cargo office or depot.



*** AIR CARGO * PROJECT LOGISTICS
* DOCUMENT COURIER * CUSTOMS AGENTS**

HEAD OFFICE

Port Moresby Jacksons Parade Saraga,
PO. Box 6645, Boroko. Ph: 325 2411 Fax: 325 4738.

BRANCHES:

- LAE PH: 472 3737 FAX: 472 3392
- RABAUL PH: 982 8515 FAX: 982 8685
- ALOTAU PH: 641 0318 FAX: 641 1633
- GOROKA PH: 732 2818 FAX: 742 2937
- MADANG PH: 852 3333 FAX: 3050
- POPONDETTA PH: 329 7061 FAX: 329 7467
- MT.HAGEN PH: 541 1813 FAX: 542 2016
- WEWAK PH: 856 2371 FAX: 856 2371
- KIMBE PH: 983 5677 FAX: 983 5072
- TABUBIL PH: 548 9229 FAX: 9280
- KAVIENG PH: 984 2047 FAX: 984 2131
- VANIMO PH: 857 1366 FAX: 857 1309
- LIHIR PH: 986 4015 FAX: 986 4016
- MENDI PH: 549 1031 FAX: 549 1358

Mountain Transport Ltd.

Ph: 472 2011, P.O. Box 1190, Lae, MP 411, Fax: 472 1490

Mountain Transport wish to thank all the

STAFF OF PORGERA JOINT VENTURE

for their assistance and co-operation received during the last three years and look forward to a continuing relationship.

Management and Board of Mountain Transport congratulates the Porgera Joint Venture on their successful ten years of operation and wish them

*A Happy
10th Anniversary*

Orogen Minerals Limited

"WORKING FOR THE WEALTH OF THE FUTURE GENERATION"

*Is proud to be associated with
PORGERA JOINT VENTURE,
Congratulations on 10 years of
Mining Operation!*

*A leader in the development of natural resources
in PNG's mining and petroleum industries.*



Level 2 Ela Beach Tower, Masgrave St, P.O. Box 2151 Port Moresby, Papua New Guinea

Tel: (675) 321 7600 Fax: (675) 3202209

Level 10 Suite# 1001 Fairfax House 19 -31 Pitt Street Sydney NSW 2000 Australia

Tel: 02 9251 6488 Fax: 02 9251 4886

Visit our internet site
<http://www.rogen.comm>

PORT MORESBY SOCCER ASSOCIATION

First Semi Final Saturday September 30, 2000

Table with 3 columns: Time, Round, Match. Includes matches like ANZ University vs LBC Defence, Naniu vs WMI, Rapatona vs LBC Defence, Sobou vs YM2.

Table with 3 columns: Time, Round, Match. Includes matches like Tawala vs Rapatona, Bipi vs Sunset, Cosmos vs ANZ University, LBC Defence vs Rapatona.

Table with 3 columns: Time, Round, Match. Includes matches like Kutu vs Buresong, Mungkas vs Nisco, LBC Defence vs WMI, Babaka vs ANZ University (wash out).

Table with 3 columns: Time, Round, Match. Includes matches like Guria vs Wikila Tarangau, SP Brewery vs Bavaroko, Dobo Futz vs HLB Pom United, Cosmos vs ANZ University, IBS PS United vs SP Brewery.

Standby: ANZ University (Prem), Kula (D1), Telikom (W1), Murat (D2), Orogen U/18 (W2), Aigob (D3), Rapatona (D4) and Guria (Youth). Note: Muma and Asum in mens D3 have been suspended due to no affiliation and players registration.

POINTS LADDER

Table with 7 columns: Team, P, W, D, L, F, A, PTS. Lists teams like ANZ University, Rapatona, LBC Defence, SP Brewery, IBS PS United, Cosmos, Babaka, Guria, Tawala, Wikila Tarangau, Blue Kumuls, Kurti Andra.

Table with 7 columns: Team, P, W, D, L, F, A, PTS. Lists teams like Kula, YM2, Sobou, Dobo Futz, HLB Pom United, Cyclone, Bao Mitas, Normads, Bulolo Mocs, Verave, Adu.

Table with 7 columns: Team, P, W, D, L, F, A, PTS. Lists teams like Murat, Naniu, WMI, Mungkas, Nisco, Dolos, Bavaroko, Wanzesi, Duau, Monier Kayaks, Eda Ranu.

Table with 7 columns: Team, P, W, D, L, F, A, PTS. Lists teams like Aigob, Buresong, Kutu, Sunset, Bipi (Jaha), Rainbow West, HLB Pom United.

Table with 7 columns: Team, P, W, D, L, F, A, PTS. Lists teams like Rapatona, ANZ University, LBC Defence, Guria, Wikila Tarangau, Cosmos, Blue Kumuls, IBS PS United, Kurti Andra, SP Brewery, Babaka, Tawala.

Table with 7 columns: Team, P, W, D, L, F, A, PTS. Lists teams like Guria, Rapatona, LBC Defence, ANZ University, Cosmos, Wikila Tarangau, Kurti Andra, IBS PS United, Babaka, SP Brewery, Tawala.

Womens One

Table with 7 columns: Team, P, W, D, L, F, A, PTS. Lists teams like Telikom, LBC Defence, WMI, ANZ University, Cosmos, Guria, Sobou, Wikila Tarangau, IBS PS United, Kula, Cyclone, Womens Two, Orogen U/18, Bavaroko, SP Brewery, Rapatona, Tawala, Murat, HLB Pom United, Falcon, Waigani Heights, Madgaurs, Adu.

LAHI SOCCER ASSOCIATION Week 15

Sir Ignatius Kluge Stadium Saturday September 30, 2000

Table with 3 columns: Time, Round, Match. Includes matches like KA Midnorth v Asiawe, Poasum v SP Brewery, Guria v TTC Bullets, Elcom v Asiawe, Unitech v Telikom, Defence v Guria, Sobou v Rapatona.

Sunday October 1, 2000

Table with 3 columns: Time, Round, Match. Includes matches like KA Midnorth v Murat, Murat v Morobe United, Malabu v Eagle Sisters, Elcom v Sobou, Malabu v Murat, Telikom v Malabu.

Speedway (Malabu Field) Saturday September 30, 2000

Table with 3 columns: Time, Round, Match. Includes matches like Mile Dem Dem v Malabu, Sobou v Maienduo, Unitech v 8 Mile Dem Dem, Amotts v Geeoltton, Defence v Poasum, SP Brewery v Mungkas.

Sunday October 1, 2000

Table with 3 columns: Time, Round, Match. Includes matches like Sobou v TTC Bullets, Poasum v Elcom, Amotts v TTC Bullets, 8M Dem Dem v M/Bay United, SP Brewery v Asiawe.

PORT MORESBY RUGBY UNION

Bava Park Saturday, September 31, 2000.

Table with 3 columns: Time, Round, Match. Includes matches like Wanderers v Defence (U19), Uni v 1RPIR (U19), Wanderers v Defence (U21), Uni v 1RPIR (U21), Wanderers v Defence (B), Uni v 1RPIR (B), Wanderers v Defence (A), Uni v 1RPIR (A), Telikom v Defence (U19), Finpac v Harlequins (U19), Telikom v Defence (U21), Finpac v Harlequins (U21), Wanderers v Defence (B), Finpac v Harlequins (B), Wanderers v Defence (A).

Results of the Coca Cola Under 17

Junior Rugby League Regional Championship played in Klunga last weekend.

On Saturday, September 23, 2000

Table with 3 columns: Game, Match. Includes matches like Cowboys 10 beat Wailia 4, Tigers 16 beat Storm 4, Raiders 8 beat Norths 6, Storm 8 beat Cowboys 4, Wailia 10 beat Norths 4, Tigers 4 draw with Raiders 4, Norths 16 defeated Cowboys 5, Raiders 22 beat Storm nil, Tigers 20 beat Wailia nil.

On Sunday, September 24, 2000

Table with 3 columns: Game, Match. Includes matches like Wailia 6 beat Storm 4, Tigers 8 beat Norths 4, Cowboys 4 draw with Raiders 4, Norths 12 beat Storm 11, Tigers 8 beat Cowboys 0, Raiders 10 beat Wailia nil.

OLYMPIC SCHEDULE

DAY 13 THURSDAY 28 SEPTEMBER 2000

Large table listing Olympic events by time and sport. Includes categories like Athletics, Boxing, Canoe/Kayak Sprint, Diving, Equestrian, Fencing, Football, Gymnastics, Hockey, Judo, Modern Pentathlon, Rowing, Shooting, Swimming, Table Tennis, Taekwondo, Tennis, Volleyball, Water Polo, Wrestling, and Yachting.



WANTOK SPOT




Enga bai holim presentesen bilong Mioks long san



• Roy Tela.



• Leo Kondal.



• Andrew Kanamon.

GAVANA bilong Enga Peter Ipatas i askim olgeta Enga long kam stap insait long selebretim presentesen bilong Enga Mioks we bai kamap long Alpus Oval long dispela wik Sarare.

Dispela seremoni bai kamap long belo na pinis long 6 klok long apinun.

Dispela em i namba wan taim kain seremoni bai kamap we ol pipel bilong Enga i amamasim gutpela win bilong Enga Mioks long winim SP Kap gren tainel egensim Rabaul Guria.

Mista Ipatas i tok em i askim ol pipel long Enga long amamas wantaim ol pilala bilong Mioks em i tim bilong ol pipel, na ol pipel i mas kam stap amamas wantaim ol pilala.

Insait long dispela de tu, bai i gat presentesen bilong Independens Da Silva Jubill medal long ol man insait long Enga provins.

Sampela ol lain delgesen bilong ol Kabinet minista na ol arapela memba long Palamen tu bai kamap long Alpus oval long amamasim dispela.

Ol lain i tokaut pinis long kamap long givim medal em Minista bilong Pils Mathias Karani na CIS minista Micah Wee na Minista bilong Pablik Sevis Philemon Embel.

"Dispela em bai namba wan taim long histori bilong ragbi lig, wanpela presentesen bai kamap long de taim. Miok em tim bilong ol pipel orait i gutpela mipela holim pablik presentesen na olgeta man i ken tukim.

Kumul Studio bilong Goroka bai kamapim ol musik bilong dispela bikpela seremoni. Na bai i gat ol singsing tumbuna tu i stap long mekim de i kamap gutpela tru.

Broncos kosa kam long PNG

BIKEM kosa bilong Brisbane Broncos Wayne Bennett bai kamap lukluk raun long Pot Mosbi long givim sapot long PNG Gas Kumul tim.

Wayne em bikpela brata bilong Bob Bennett husat i hetkosa bilong PNG Gas Kumul.

Sempion kosa bilong NRL, Wayne, bai toktok olsem ges spika long fanraising lans long Islander Travelodge long Pot Mosbi. Wanwan tebol bilong 10-pela man em ol i salim long K1,700.

Dispela kaikai i no bilong sapatim ol Kumul tasol nogat long harim tu sampela gutpela toktok bilong namba wan kosa insait long wol.

Jenerel menesa bilong Papua Niugini RAgbi Futbol Lig Kevin Murphy i tok em i

namba wan taim wanpela ol top kosa insait long wol i painim taim long kam toktok wantaim ol pipel bilong Papua Niugini.

"Mipela i laki tru long kisim wanpela man husat i save planti moa long ragbi lig long kam long hi.

PNGRFL deputi siaman Jim Robins i tok PNGRFL i laik olgeta man husat i kamap long dispela lans i mas werim siot o lap, lap i gat kala bilong PNG long soim sapot long Kumuls.

Taim Wayne i stap long Pot Mosbi em bai lukim ol Kumul i trening long Golde Bareks long Oktoba 12.

Brata bilong Wayne na Kumul kosa Bob i tok em i no laik mekim toktok long brata bilong em.

"Ol niuspepa, radio na TV i save to olsem Wayne i no man bilong mekim planti toktok tasol kaikai bilong em i save kamap long fil taim tim bilong em i pilala."

"Em i wanpela gutpela pablik ges spika na planti ol lain irsait long Australia i save askim em long toktok," Bob i tok.


Arapela samting tu bai kamap em Dennis Knight bilong Brisbane bai kam mekim sampela singsing tu long dispela lan.

Bihain long sampela de ol Kumul bai go long Townsville long bungim Australia Kangaroo long Oktoba 7. Ol bai kambek long Pot Mosbi na lusim Pot Mosbi long Oktoba 21 long Frens.

PNG i st ap long sem pul olsem Frens, Saut Afrika na Tonga.

Em i Gutpela Em i Tuna Em i bilong PNG stret...

PROUDLY



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.